

‘लुँधवाखा’ नेपालभाषाया बाखंया स्वलापौ

लुँधवाखा

नं - २६ ल्या: - १ थ्यंल्या: - ११४

ने.सं. ११४० सिल्ला-चिल्ला-चौला २०७६/२०२०/२५६३



बिजय बलामि



मू : १००।- तका

११४

हलिमय् नेवाः शाक्यतय् कालिगढीया

अनुपम दसुकथं धस्वानाच्चंगु


लाय्कू, ख्वपया लुँध्वाखा थें

नेपालभाषाया बाखं विधाया स्वलापौ

“लुँध्वाखा”

धिसिलाक्क न्ह्यज्याना

च्वने फयेमा भिन्तुना ।



भक्तपुर सुनचाँदी व्यवसायी संघ

भक्तपुर सुनचाँदी व्यवसायी संघ

BHAKTAPUR GOLD AND SILVER DEALER'S ASSOCIATION

Inacho Tole, Bhaktapur Municipality-7

‘लुँध्वाखा’ नेपालभाषाया बाखंया स्वलापौ

लुँध्वाखा

दं - २६ ल्या: - १ थ्यंल्या: - ११४

ने.सं. ११४० सिल्ला-चिल्ला-चौला २०७६/२०२०/२५६३

भ.पु.जि.प्र.का.दुतिल्या
१३/०५३/५४

सहलहमि
कृष्णलाल प्रधान
मथुरा साय्मि

सम्पादक
बिमल ताम्राकार

व्यवस्थापक
बिष्णुकेशरी ताम्राकार

पिकाक
कुत: पिकाक
नेपालमण्डल

स्वापू
लुँध्वाखा ज्याकुथि
भुलांचा, खवप
नेपालमण्डल
९८४१३७४०६५

bimaltamrakar2005@yahoo.com

मू - १००१- तका

११४

सम्पादकीय

ने.सं. १११४ थिंलां लुँध्वाखा लय्फय्पौ पिथनागु खः । थ्व सच्चि
व भिस्वंगूगु ल्याः तक पिहां वयाः दिनाच्वंगु खः । थुकियात हाकनं न्हूकथं
न्त्याका यंकेमाल धयागु वाःचायेका स्वलापौ कथं पिथनेगु ग्वसाः ग्वयागु
खः । थौकन्हे नेपालभाषाया साहित्य ख्यलय् न्हूबाखं, चिबाखंया लबु
दनाच्वंगु दु । चिबाखं विधाया कःघानाः लुँध्वाखापाखें पिब्वयेगु बिचाः
याना । मुक्कं बाखं विधायात कःघाना न्हापा ‘पल्पसा’, ‘जला’, ‘बाखं दबू’
आदि पिदनेधुंकूगु नं थन ल्वःमंके मज्यू ।

लुँध्वाखा स्वलापतिइ न्हूबाखं, न्हूबाखंचा, चिबाखं, बाखं सम्बन्धि
च्वसु, बाखं सफूया समालोचना, समीक्षा नं दुथ्याकेगु कुतः यायेगु
जुइ । थुकिइ फच्छिफत्ले तःम्ह बाखंमिपिनिगु न्हूबाखं, चिबाखं दुथ्याकेगु
कुतः याये । गुबले ह्वःताः चूलात धाःसा छम्ह जक चिबाखंमिया
चिबाखं जक दुथ्याका चिबाखं मुना कथं नं पिथनेगु जुइ ।

न्हूबाखं व चिबाखंया खँलायेबले बाखंच्वमिं थःगु नुगःया खँ
तप्यंक कना च्वल धाःसा व न्हूबाखं वा न्हूबाखंचा जुइ तर थःगु नुगःया
खँ तप्यंक मकंसे मेकथं विम्ब व प्रतिकया ग्वाहालि कया च्वलधाःसा
व चिबाखं जुइ । चिबाखनय् म्होचा बाखंम्बः, छगू निगू लु, म्होचा
खँग्वलं कनाच्वंगु दइ । गुकिइ ध्याचु जाःगु अन्त्य दइ ।

थुपाले मेसेञ्जरं नेपालभाषा चिबाखंमिपिके चिबाखं फ्वनागु
खः । छवाल्य् नीपु मयाक चिबाखं दुत्युंवल । गुकिं थ्व ‘लुँध्वाखा’
चिबाखंया स्वलापौ पिथनेत तःधंगु हःपाः जूगु दु । सकले चिबाखंमिपितं
व थ्व ल्याः पिथनेत विज्ञापन बियादीपिं सकसितं दुनुगलं सुभाय्
द्यछानाच्वना ।

थुकिइ दुथ्याःगु बाखंच्वमिपिनिगु किपा पुलांपुलांगु लाःवंगु दइ ।
थःपिनिगु न्हून्हूगु किपा व न्हूबाखं, न्हूबाखंचा, चिबाखं, व बाखं सफूया
समीक्षा, समालोचना बियादिइत इनाप यानाच्वना ।



लुँध्वाखा नेपालभाषाया बाखंया स्वलापौ
जुया पिदनेत्यंगुलिं मदिकक सुथां लाक्क
पिथने फयेमा धकाः भिंतुना ।



महेन्द्रगोपाल कर्माचार्य
प्रधानाध्यापक
शान्तिनिकेतन माध्यमिक विद्यालय
कुमागु, बोलाछे-४, खप, नेपालमण्डल
फोन ल्याः - ०१- ६६११३१७

लुँध्वाखा नेपालभाषाया बाखंया स्वलापौ
जुया पिदनेत्यंगुलिं मदिकक सुथां लाक्क
पिथने फयेमा धकाः भिंतुना ।



काभ्रे बहुमुखी क्याम्पस
बुदोल, भुवत-६, काभ्रे, नेपालमण्डल
यांभायल्याः - ०११-६६११३३
www.kavrecampus.edu.np

लुँध्वाखा नेपालभाषाया बाखंया स्वलापौ जुया पिदनेत्यंगुलिं
मदिकक सुथां लाक्क पिथने फयेमा धकाः भिंतुना ।



साइन उडेन इण्डस्ट्रिज

राममन्दिर-४/ताथली-९, खप, फोन ल्याः - ६६२०६२०, ६६१४६८४
E-mail: shinewooden@gmail.com

गुणस्तरीय कलात्मक झ्याः, लुखा व देगः, मठ दयेकेगु नापनापं बांलाःगु बल्लागु फर्निचर माःसा

घलःपौ

चिबाखं

६ / भंगः	- धूस्वां सायूमि	३० / बुखं	- न्हुछेभक्त कवां
७ / अःखःगु सुरुवाः	- सुधीर ख्ववि	३१ / ब्वना-पौ	- महेश 'लँजुवाः'
८ / अन्तर	- रेणु श्रेष्ठ	३२ / मनू म्हसिल	- उद्धव मास्के
९ / अधिकार	- श्याम आशा	३३ / म्हगस	- नरेश अमात्य
१० / अर्गानिक	- सुरेन्द्रलाल भुजु	३४ / रेमिट्यान्स	- कृष्णभक्त बोडे
११ / उकुन्हु तंया ...	- नर्मदेश्वर प्रधान	३५ / लिच्चः	- रासा
१४ / क्वः व मनू	- महेन्द्रगोपाल कर्माचार्य	३६ / ल्वापु	- दिलकुमारी डंगोल
१५ / ख्वाःपाः	- कृष्णलाल प्रधान	३७ / सच्छि बंगु नोट	- लक्ष्मीचन्द्र बज्राचार्य
१६ / ख्वाःपाः	- वसन्त नकर्मि	३८ / सरी अनुराधा	- स्नेह सायूमि
१७ / गांगांया बाखं	- रत्न कोजू	३९ / सलामी	- सौरभ शाक्य
१८ / जिम्ह हनुमानजि	- गोविन्दमान श्रेष्ठ	४० / सिरपाः	- राज सायूमि
१९ / छफुति छफुति लः	- मथुरा सायूमि	४१ / हर हर महाद्यः	- विमल ताम्राकार
२० / आइडिया	- अनिश शाक्य	४२ / ह्यूमायून क्वाइन	- बद्री वेदना
२१ / च्वमिया ख्वाः	- विमल प्रभा बज्राचार्य	४३ / अभिनय	- डम्बर रसिक भारती
२२ / जि मां भाय् मसः	- ज्ञानीराजा मानन्धर	४४ / ह्वःताः	- काशीराम विरस
२३ / भंगः	- रविन श्रेष्ठ	४५ / स्पेयर पार्टस	- कृष्ण बजगाई
२४ / थासय्	- ध्रुव मधिकर्मि		
२५ / जैला लप्ते	- बाबुकाजी सुवाल		
२६ / देशया ख्वाःपाः	- सुनिल बज्राचार्य		
२७ / द्यः	- हरिगोविन्द भोमि		
२८ / न्ह्यःया वासः	- ईश्वरीमैयाँ श्रेष्ठ		
२९ / बिष	- शाक्य सुगत		

समालोचना / समीक्षा

४५ / श्याम आशाया ...	- पूर्ण ताम्राकार
४८ / 'स व खः'या ...	- दीपकराज 'ख्वप'

न्ह्यापां निसैं पत्याः, सकसियां भल्सा

श्री गणेश ज्यास पसः

बालाखु(A)
०१-६६१०६०१



सुकुलढोका(B)
०१-६६१५८२८

साकोठा(C)
०१-६६११६४४



लुँ, बहया न्हूगु बांलाःगु डिजाईनया
तिसा दयेके माःसा नापं दक्वं कथंया
राशी रत्न व थी माःसा स्वापु तयादिसँ ।

लुँध्याखा नेपालभाषाया खाखंया खल्लापौ
जुया पिदनेत्यंगुलिं मदिकक खुथां लाकक
पिथने फयेमा धकाः भिंतुना ।



सहज बचत तथा ऋण सहकारी संस्था लि.

फोर्छे-२३, येँ

फोन : ४२६२१२८, ४२२१२८४

सदस्य सेवा केन्द्र : ग्वंगःबुँ-९, येँ

लुँध्याखा नेपालभाषाया खाखंया खल्लापौ
जुया पिदनेत्यंगुलिं मदिकक खुथां लाकक
पिथने फयेमा धकाः भिंतुना ।

दर्ता नं. : ४८२/०६७/६८

सहकारी ऐन २०४८ बमोजिम स्वीकृत प्राप्त

पान नं. : ३०४५०२२६६



मिमेश्वर बचत तथा ऋण सहकारी संस्था लि.

Saving & Credit Co-operative Ltd.

सूर्यविनायक न.पा.-६, भक्तपुर. फोन नं. : ०१-६६१५८१२

घड्या




थव चिबाखं ल्याः नेपालभाषाया न्हापांम्ह चिबाखमि
धूस्वां साय्मिजुयात

भंगः

उखुन्हु थःगु विचार सागरस लाल कया भावनाया आकाशय् ब्वया च्वनावलय् न्ह्यःने छम्ह मचा व छम्ह बुरा ब्वाँय् ब्वाँय् वन । बुराया ल्हातय् छगू पंजः दु । पंजलय् छम्ह बांलाःम्ह भंगः दु । मचां धयाच्वन, 'जिमि गथे गथे याना लहिना तयाम्ह भंगःयात ब्वयेका छवइन का ...' बुरां न्यागः वंगु ध्याग ब्युब्युं धाल, 'भंगः लहितकि पाप लाइ धकाः मस्यूला ? थ्व भंगः जितः ति, ना न्यागः ध्यबाया मरि न्याना न ।'

ध्यबा कया मचा लय्तातां वन । बुरा पाप मुक्तियागु प्रवल इच्छा व विश्वासं प्रफुल्लित जुयाः भंगःयात मुक्त यानाबिल ।

भंगः, पंजलय् लानाच्वंम्ह भंगः प्रकृतिनिसें हे मुक्तिया प्रेमी भंगः थःत मुक्तावस्था खँबलय् आनन्दं वँय् हे जुल । भुरुभुरु छकः ब्वल, भ्वाक्क जुत । भंगः, गुम्हसिया प्रकृति हे खः ब्वयेगु ब्वये मफुत । तमं भंगः कां जुल । वया त्वःमन, न्यागु पंजलय् च्वँच्वं वयागु पपुतिइ ब्वयेगु शक्ति नाश जुइधुंकल । व हानं घमण्डं ब्वल, तर भ्वाक्क जुत । ब्वइगु, भ्वाक्क जुइगु । थ्व तमाशा बाघौति जुयाच्वन । भंगः शक्तिहीन जुयाः अन हे बुँइसं भाराभारा मिनाच्वन । च्वय् आकाशय् ब्वयाच्वंम्ह इमां थ्व खन । क्वहाँ वया भंगःयात ल्वात्त दाया यंकल । बफरा भंगः ।



मूस्वाँ (लघुकथा)

धूस्वां साय्मि

मूस्वाँ (लघुकथा) पौ ८

अःखःगु सुरुवाः

विनय बेरोजगार न्ह्यागु नं अफिसय् थातं च्वने मफु, मसः वा मंमदु छु खः। सरितां छुं हे धायेमफु। थः अफिस वनेत्यय्का नं घना तुं च्वंम्ह थःभाःतयात पुलुक्क स्वयाः निदं दुम्ह म्हाय्यायात बुयाः क्वाथां पिहाँवन।

सरिता पिहाँ वंगु छ्घौ लिपा विनयया मोबाइल न्यात। नम्बर व नां खनेवं वया खाः चकन। याकनं वा लाइन क्लियर दु। उखें छु धयाहल न्यं हे मन्यंसे मोबाइल दिक्ल। हथासं दन। फ्रेश जुइत वन।

पलख लिपा क्वाथाया खापाय् धकधक सः तायेदत। उघिमय् मिसा छम्ह दुसुत। विनय हथासं न्ह्याःवना वयात घय्पुत, 'ओ संगीता गवाय्सकं लिबाक्क वयागु।'।

लिसलय् संगीता मुस्सुक न्हिला वं नं विनययात कक्ताक्क घय्पुत।

छ्घौ ति लिपा संगीताया मोबाइल न्यात। संगीताया छें फोन वःगु जुयाच्चन, 'छ गन' धकाः न्यन जुइमाः वं हथासं जि पासाया थाय् धकाः लिसः बिल। 'का का वल' धाधां मोबाइल दिक्ल। खाता क्वय् द्विचिनाच्चंगु थःगु वसः हथा हथासं पुनावनेत क्वाथाया खापा चाय्केत स्वबले खाताय् ग्वतुला तुं च्वंम्ह विनयं धाल, 'गुलि हथाय्चायागु छ ! सुरुवा छकः स्वःसा अःखतं न्ह्यातका छं।'।

सनिलय् सरिता अफिसं लिहां वल। न्ह्यः वःम्ह म्हाय्यायात बुया। त्यानुपहः ख्वालय् लेहेंलेहें बुयाच्चन। वयेवं मचायात खाताय् ग्वतुका थः नं खुइइयँ सासः ल्हाना फेतुत। वयागु खाः स्वःम्ह विनयया मिखा सरिताया सुरुवालय् तक्पंवन। वयागु मिखा व मन अवाक जुल। न्ह्यपुइ छत्थुं हे भवखाय् ब्वल। सरितां न्ह्यानातःगु सुरुवाः अःखः जुयाच्चन।●



सुधीर खबि

● चिबाखं

- रेणु श्रेष्ठ

अन्तर

थौं पौष मसान्त, कन्हे घ्यःचाकु संल्हु ... ।

उकिं चिं निसें मुलु सुका तक्कं दइगु धिरेन साहुया
पसलय् पलाः तयेथाय् मदु ।

उमेश, धिरेन साहुया न्हिया न्हिथंयाम्ह ग्राहक खः ।
पसः वयेत थौं वय्कलं थः म्ह्याय् ल्युल्यु ब्वनाहःगु दु । म्ह्याय्
मय्जुया पुलि तक्क वःगु बुथ लाकां व मरि थें ख्वातुगु
ह्याउँसे च्वंगु ज्याकेटं मचा भन हे नासलं लिना भःभः
धाः ।

उमेशं थः म्ह्याय्यात थी थी चकलेटया नां काकां
न्यानाबिइ ला धकाः न्यनाच्चनी । हिहि चाचां मचां, 'अहँ
... ! ड्याडी जितः चकलेट नये मयल धयां' धकाः
हालाच्चनी ।

बौ म्ह्याय्या खँलाबल्हा ल्यूने व हे धिरेन साहुया
पसलय् भारी क्वबीम्ह माइली दिदि व वया म्ह्याय् न्यनाच्चनी ।

सालुसे च्वना गुइधुंकूगु लं, खालि तुतिं, न्हासं न्हि
सुलुसुलु वयाच्वंगु ... ! थ्व माइली दिदिया म्ह्याय्या पिनेया
आवरण खः ।

तुलुतुलु स्व जक स्वयाच्वंम्ह माइली दिदिया म्ह्याय् नं
थःगु म्हुतु प्वाः चाय्की, 'साहुजी ... साहुजी जिमि मांनं भारी
क्वबियावःगु धेवां कन्हे चाकु स्वपा प्यपा व घ्यः छकूचा बियाः
हयादिसँ न्है ... ।'



रेणु श्रेष्ठ

● चिबाखं

- श्याम आशा

अधिकार

वयागु गामय् तःखा छें धस्वात ।

दय्कूगु छें फुक्कं उ थें । सखे सरकारं खना बिउगुलिं
उ थें जूगु जुइमाः !

गामय् मेमेपिं पीडितत थें व छम्ह नं पीडित खः । तर
वयात ला छु ?

चा छकू नं मथ्याः । वं तम्हेसित थ्व विषय ज्वजलपा
याःवन । अथे नं वयात छु मदु !

व स्वतन्त्र मनू वयागु भासं धायेगु खःसा व बुसां निसें
स्वतन्त्र सा आः वया छाया गुलामी ? आः छाया पार्टी माल ?

व छुं नं पार्टीया दुजः म्हिगः नं मखु आः नं मखु ।
वयागु सासः व बुसां निसें स्वतन्त्र तिनि ।

सखे अथे जुयाः जुइ वयात छें भाग मथःगु ! वयात छुं
राहत नं मदुगु !

इलय् ब्यलय् वयात तं पिहां वइ ।

भुनुभुनु हाली व, 'पार्टीया दुजः मजूपिनि म्वायेगु
अधिकार नं मदु ला ?'



श्याम आशा

●

अर्गानिक

जितबहादुरं तरकारी, फलफुल पसः तयाः जीवन हनाच्चंगु यक्व दत । व हे पसः तयाः स्वम्ह मस्त ब्वलंकल । निम्हसिया व्याहा नं सिधल । छैँ छकू नं दय्कल ।

वस्ती बढ्य जुल । वया जःखः पसः नं यक्व दयावल । न्याइपिं मनू नं ला अप्वयावल । उमेरं भचा सुस्ती वःगु ला मस्यू । जितबहादुरया पसः उलि चल्य मजुल । जःखः पसल्य हुलमुल, वयाथाय् खाली खाली । जितबहादुरं बिचाः यात, गथे याना व्यापार अप्वय्केगु ? परिवार लहीगु आधारय् थ्व हे पसःचा खः । पसःया बाः नं पुलेमाः । खर्च यायेत हे मगानावल । जितबहादुरया चितासू मन्त । साप जक बिचाः यात ।

जितबहादुरं छगू आइडिया पिकाल । साइनबोर्ड छपाः च्वकाहल, 'अर्गानिक फलफुल, तरकारी पसः ।' वं पिने साइनबोर्ड यख्खाल, भचा सफासिफा यानाः रंगरोगन यात । भाः नं भचा उप्वः तल । पसल्य बुलुहुं गाहां उप्वया वल । अर्गानिकया छुं प्रमाण माःगु नं ला मखु ? भाःया छुं ठेगान नं मदु । वयागु म्हुतु हे प्रमाण जुल, वं धाक्व भाः जुल ।

‘भीगु हे समूहया फार्मया अर्गानिक सामान । अर्गानिकया भाः भचा थिके हे जुइ !’

वं माल थ्याका बिइ हे मफु । ‘स्वास्थ्ययात न्हापां बिचाः यायेमाल नि’ वयागु धुवा जुल ।

पसल्य मनूत हुलमुल वल । जितबहादुर हानं न्हापा थें तुं मालामाल जुल ।



सुरेन्द्रलाल भुजु

उकुन्हु तंया भोकय् जिं मिखां मखन

उकुन्हु चान्हय् हस्पिटलय् यंकल । सुथय् म्थ्याय् बुल ।
न्यना । छकः स्वःवनेमाःगु । मतिइ लुइ । गय् वने ? मछीं थें ।
गय् थें गय् थें जुइ, काय्, म्थ्याय् । निम्हं दयेधुंकल । माःगु ला
हानं मचा दयेकाच्चंगु ? उकिं हे जुइ मचा प्वाथय् थाःसां निसें
वया ख्वाः खिउँ । जि लिसे न्हापालिपा थें मखु । उलि ख्वाः
चकंका खँ मल्हाः । खँ हे ल्हाःसां उसिचा थें च्वं । न्त्याबलें ।
मतिइ तये । मचा गयेधुंकूम्ह । हानं ... दैवी ... अनुमान याये
... व हे कारणं जुइमाः वया व्यवहार अथे हिउगु ।

वने ला माःगु खः । जहान परिवार थें यानाच्चनापिं ।
थ्व हे भिला मखा दत ... वं उलि स्वापू मतःगु । नत्र सा ला
छु ... वयात मालीबलय् जि ... जितः मालीबलय् व ... फुगु
चाःगु ग्वाहालि जिमि दथुइ जुयाच्चनी । मयः मयः वया प्वाक्क
मचा दयाबिल । ख्वाः हे चमकन ... शायद हस्पिटलय् नं अथे
हे मखा जुइ । वं ला वनेका ... बांलाक खँ मल्हाःसा छु याये ...
ख्वाः खिउँका च्वंसा गथे याये ? मचा दत धकाः वयात सुभाय्
बीगु ला । सान्त्वना बीगु ला । सुभाय् बी ... व्यङ्ग तायेकीगु
खःला ? मनय् धौबजि वाली प्रतिप्रश्नं दुःख बी ।

मज्यू घूसं निसें ... वया स्वभाव पाः । खँल्हाइ ... घेंघें
धाः, न्हिले थाकूचा ... जितः ला तं नं वःगु खः । थः ढंग मदु ...
इलय् बिचाः यायेम्वाः ... जिपिलिसे तं चायां ... घेंघें धयां छु



नर्मदेश्वर प्रधान

याये ? वं सीके म्वाःला ... दुर्घटना जुइफु धकाः
 ... म्वाःले धुकूसेलि अपरेशन याना छवयेमाः
 का । छुकिया ढिलासुस्ति ... अले छु ले ?
 न्त्याक्व बचे जुयां छु याये ... छघौ नं गनं
 थ्यंकी ... गुलि पाकी ... वं मसिउला ... थः
 इलय् बिचाः गाके म्वाः ... अले ख्वाः खिउँकाः
 जुयां छु याये ? जितः नं तं वइ छाये घेंघें धाःगु
 वः ... कर्पित तं क्यनाः जी ला ... मिजं नं
 उस्तैम्ह । मिजं माने मजू हँ । निम्हय् छम्हस्यां
 अपरेशन याये ।' तक्वः हे मिजंयात आग्रह यानागु
 खँ ... दः वं कं ... छाये थें मस्यू ... म्हुतुं ज्यू
 ज्यू धा ... तर ... ज्या च्वमन्त्या ... मिजं खना
 थ्व खँय् व दिक्क । जितः वं इलय्ब्यलय् थःगु
 दुःख प्वंकी । छु याये मिजंतय् न्त्यःने भी छु लगे
 जुइ ... । हारे चायाः वं बरोबर थःगु नुगः प्वंकी ।

थाकु ... थौकन्हय् मस्त ब्वलंके अःपु
 मजू । छम्ह निम्हेसित हुकें यायेत हे व गाक्क
 ध्यबा माः ।

आम्दानी अथे हे खः । न्हापा थें खः ला
 ... मस्तय् स्कूलय् हे ब्वलंदः काइ ... नकेत्वंके हे
 माल ... आसे अले धाये जिउगु मखु मस्तय्त
 ... उसाँय् मदयाच्चनी । डाक्टर, वासलय् उतिकं
 ध्यबा फुके मालाच्चनी ... उकिं वया ख्वाः
 खिउँगु जुइ । मचा गायेधुकूम्ह ... छम्ह जक सा
 म्वाल धायेका ... काय् म्हाय् निम्हं दयेधुकूसेलि
 गाका छवःसा जिउम्ह ... मिसाया ला व हे
 बिचाः ... मचा गात ... हानं दया बी ... वया

म्हय् जिउ हे मदु ... सदां वया चिन्ता ...
 चाःहुइका जितः वं थःगु पीर प्वंकाच्चनी ...
 मिजंयात न्यंके मफु ... दुःख प्वंकाच्चनी । वयागु
 खँ न्यने । वया मिजनं म्हुतुं जिउ जिउ धाइ । खँ
 न्यंगु धाःसा खनेमदु ।

मतिइ खँ लुयाः वयाच्चनी । दिकां दिके
 मफु । रमोला छकः स्वःवनेमाली । न्त्यसः लुइ ।
 गय् वने ? तुति हे न्त्याके थें मच्चं । वनाः छु
 धाये ? म्वाल दुम्ह दयेधुकल थः पुता ला खनि,
 मतिइ छुं तयेमते, वयात थुइकेगु ला । इलय् हे
 बिचाः यायेम्वाःला धकाः न्वायेगु ला । भिला दत
 वं बांलाक खँ मल्हाःगु ... आः नं व अस्पतालय्
 न्हिल खइ मखुनि ... वने । बांलाक खँ मल्हाःसां
 मचा दयाबिउगुलिं व दिक्क जूगु खः ... जिं
 सिउ । तं चायां छु याये दुम्ह दयेधुकल । वयात
 मनोबल बिल ... ।

रमोला जिथाय् च्वंगु च्यादँ दत । वया
 मिजं पिनें वयाच्चंम्ह । जागिरे । जिथाय् च्वय्
 तँय् । बालं च्वनाच्चपिं इपिं । थनं च्वँच्वं हे
 रमोला व मिजंया निकः प्रोमोसन जुइधुकल ।
 काय् म्हाय् नं थन हे बूपिं । थन च्वँच्वं हे जग्गा
 न्यात । छँ दय्कल । थौकन्हय् थःगु छँय् बालं
 तयातल । थ्व छँ तू रमोलां धाइ । थुपिं जि थाय्
 बालं च्वनाच्चन । धायेगु जक बालं । रमोलाया
 परिवार व जिपिं छँथुवाः व बालं च्वपिं थें मखु ।
 छगू हे परिवार थें । ल्वापु ख्यापु गबले मजू ।
 बाः बिउ । छकः निकः लिबाःसां जिमिसं छुं

मधया । बाः नं अथे थमकया । जिमित इपिं पासापिं थें ।

मालीबल्य् ग्वाहालि आदान प्रदान जुइ । रमोला जिथाय् वयाच्चनी । न्हिनय् पाखे । जि नं गबलें वयाथाय् वने । गबलें मालीबल्य् रमोलायाके दुरु, चिनी, च्या नं त्यायेकाये । हानं पुलाबिइ । वं नं आखिर जुइबल्य् माःगु काइ । हानं बिइहइ । स्वापू सौहार्द्रपूर्ण ।

उखुन्हु छकः धाःसा जितः तसकं हे नुगल्य् स्यात । वं अथे गबलें मयाः न्हापा लिपा । मालीबल्य् व जि थाय् वइ । दु थें फु थें ग्वाहालि याये । जि नं आखिर जुइबल्य् 'सय् रमोला' धाःवने वं त्वहः तयामच्चं । फुगु सहयोग याइ । अथे ला खःनि व्यवहार्य् च्वनेबल्य् ... परिवार थें जुइधुंकूगुलिं मछालाः मच्चना जिपिं । कया थें पुलेत जिपिं उलि हे हथाय् चाः । कालबिलया याना थें बिइ मसलकि खः समस्या वइगु । उखुन्हु धाःसा दः रमोलाया व्यवहार्य् भचा पाः थें च्वन । न्हापा लिपा ला अथे गबलें त्वहः तइम्ह मखु ... उखुन्हु वं आलताल यायेत स्वः थें ताल । हथाय् जुया 'न्यासः दां दइ ला' धकाः जिं रमोलाया थाय् वना । 'दः ला दु, मिजंयाके छकः न्यने, हन्चा कयादिसँ मजिउ ला ।' न्हापा लिपा रमोलां थथे गबलें मधाः ... थौं थथे छाय् धाःगु ... जिं छुं थुइके मफुत ... जिगु न्त्यपु चाःहुल जितः तं नं पिहां वल ... थुलि दामय् नं दः थथे पत्याः मयाःगु ... छाय्

मिजंयाके न्यनेमाःगु द्दलद्वःया खँ ला व ... जिं छन्हु निन्हुं लित हे बिइ ... मिजंयात छाय् सिइका च्वनेमाःगु ... जितः ला नुगल्य् स्यात ... जिं लिपा दांया खँ हे न्त्यमथना । आखिर मेकथं हे तरय् याना ।

व न्हि १० बजे जुलं मयायेधुंकल । जि आनाहां न्त्यः वयेधुंकल । पिने खापाय् घरघर यात । थुवेति सु वःगु जुइ ? जि दना । लुखाय् वना । त्वतं स्वयां । खिउँसे च्वं । अय्नं तिमिलाया जः दु । रमोला खनी । खापा चायेके । 'थुवेति । छु जुल, रमोला ? छाय् सुं म्हं मफतला ?' जिं न्यना । मखु चीसलं रमोलां धाल, 'आपत जुया जि वयागु ... दः व छगू बियादिसँ ले ... ।' रमोलाया खँ जिं थुल । न्हापा नं छकः निकः आपतय् जिथाय् वइ । कया यंकी ।' थुगु पटक्य् जितः भचा नुगल्य् स्यानाच्चंगु ... न्यासः दां हे पत्याः मयाःगु खँ लुमनी । रमोला, क्षमा या । थौं जिके मदु ... छगू हे मदु ... छु याये ?' जिं अनायास धाये । जिं सिउ रमोला उबले ख्वखमख्व धयावनी । बिना ढाल युद्धभूमिइ वने मालीबल्य् योद्धां थःत निरीह खंकी । बिना ढाल हे व क्वथाय् दुहां वनी । जितः धाःसा उखुन्हु सन्तोष अनुभव जुइ । वयां लिपा वया मज्यू दिइ । फिला लिपा मचा दइ । थौं जितः बिचाः वइ उखुन्हु रमोलायात छगू व बिउगु खःसा दुर्घटना मजुइगु जुइ । तर तंया भोकय् जिं छुं मिखां मखन । छु याये ?

वचः व मनू

छपु ताहाकःगु कथि, कथि च्वकाय् सुका, सुकाय् चिना
यःखायातःगु स्वपाः मरि, कथि ज्वनाः न्ह्याःवनाच्चंम्ह छम्ह
मनू ।

व मनूया लिउने मरि कुतुं वइ नये धयागु आसं
क्वाःक्वाः हाहां ल्यू ल्यू व्वयाच्चपिं क्वःया बथां ।

मरि क्यनाः क्वःतय्त ल्यूल्यू तयावःम्ह मनू तापाक्क
थ्यन ।

वया ल्यूल्यू वःपिं क्वःत नं अन हे थ्यन । मनू छथाय्
फ्यतुल ।

‘आः ला मरि कुचा याना नकि जुइ ।’ धयागु आसं खः
वा नये पित्याना हालेगु ताकत हे मदया खः हालेगु त्वःताः
क्वःत जःखः च्वंगु सिमाकचाय् च्वना मरि नयेगु आसं वयात
स्वयाच्चन ।

वं छुं घांजा मुना च्याकल ।

कथिइ यःखायाहःगु मरि लिकाल ।

मिइ क्वाकल । क्वाःगु मरि सवाः कयाः नल ।

ध्याऊ यानाः धक्का तल । क्वःत ज्यः जुल ।



महेन्द्रगोपाल कर्माचार्य



स्वाःपाः


सूर्यप्रसाद व सुशिलाया छम्ह मचा दत । निम्हत्पूया लय्ताया थाःगाः मन्त । ह्याउमचा स्वःवःपिं पासापिं सकसिनं धयाथें ह्याउमचाया खाः पासाम्ह श्यामलालया खाः थ्याक्क ज्वःलाः धकाः धायेगु यात । सूर्यप्रसाद व श्यामलाल छखा हे छैय् च्वनीपिं पासापिं खः । सकसिया मचाया खँय् छप्पाः हे म्हतु जूगु खनाः निम्हत्पूसिया नुगलय् तितिमिंक सुल । सूर्यप्रसाद शंका उपशंका वाथावाथा कन । निम्हत्पूया दथुइ माखापिखां जाः थानाहल । सुशिलां थःगु पतिव्रतायात कयाः थः भाःतयात थुइके मफुत । लिपा सुशिलायात विश्वासघातया पामलखं कल । थः भाःतया हिस्याना सह यायेमफयाः थःछैय् वन । अन हे च्वंगु च्वनं ।

ईया घःचाः हिलावन । सूर्यप्रसाद व सुशिला व्यागलं च्वंगु नीन्यादं पुलेधुंकल । सुशिला छगू माध्यमिक विद्यालयय् प्रधानाध्यापक । म्हयाय्म्ह निर्णया कार्डिओलोजी एम.डी.(गोल्ड मेडलिष्ट) याना छगू नांदंगु अस्पतालय् डाक्टर लजगालय् सेवा यानाच्वन ।

संयोगया खँ खः, सूर्यप्रसादया छन्हु सहायाये मफयेक छाति स्याका वयात अन हे छगू अस्पतालय् हल । स्वास्थ्य जाँच व उपचारया भवलय् डा. निर्णयां ल्वगि सूर्यप्रसाद सुशिलाया भाःत धयागु खँ सिल । सुशिलाया भाःत नापंया विछोडया अप्रिय हुनिं डा. निर्णयां स्यू । वयागु नुगलय् थःबौप्रति घृणा, तिरस्कारया भावना न्ह्याबलें थें दासि वयाच्वन । समाजय् थः म्हयाय् छम्ह बांलाःम्ह मनू जुयेमा धयागु मांया चाहना । मांप्रति जूगु अत्याःया व्वला सायेगु भावनां व सिद्धहस्त जुल । वं ह्वःता चूलाबलय् थःगु व सूर्यप्रसादया डि.एन.ए. टेष्ट याकल ।

‘जितः छु ल्वय् जूगु डाक्टर साहेब ?’ सूर्यप्रसादं न्यन ।

‘छित म्हया ल्वय् स्वयाः नुगःया ल्वचं कःगु खनेदु, मखु ला ?’



कृष्णलाल प्रधान

जिके छगू पुलांगु नुगःया ल्वय् दु । न्ह्याक्व हुइत स्वःसां हुइ मफु । गुकिं जितः न्ह्याबलें क्वत्यलातल ।’ ल्वगिं डाक्टरयात नुगःया खँ न्ह्यव्वया क्यन ।

‘छि कलाः सुशिलाया जि म्हयाय्मचा खः । छिगु व जिगु डि.एन.ए. टेष्ट याकागु दु । दक्वं ज्वः लाः । जि छि हे म्हयाय् खः बा ।’

सूर्यप्रसादं थ्व खँ तायेवं आकाशं पाःतालय् कुतुंवःथें जुल । म्ह थपायेत्यानावल । नुगः तज्याइ थें जुल । थःत कःघाना धाल, ‘म्हयाय् ! जिं तःधंगु द्वकेलात । जि क्षमा यायेवहः मजू ।’

सूर्यप्रसादं डाक्टर म्हयाय्या निपा ल्हाः थःगु छ्यनय् दिका ह्वाँय् ह्वाँय् ख्याहल, ‘जि पापीयात क्षमा या ।’●

ख्याःपाः

‘यात्रा ! तीर्थ यात्रा वनेमाः का अले सिइ अनेक अनेक थाय्बाय् दान - पुण्य, धर्म - कर्म छु खः धकाः ।’ जिगु त्वालय् रामसिंह ककां सकसितं न्यकीगु खँ खः थ्व ।

म्हगः सनिलय् हानं नापलात रामसिंह ककायात ।
‘आः गुबले वनेगु ले तीर्थ यात्रा ?’ जिं न्ह्यसः तया ।

‘धात्थें वनेगु खःला ? थ्व हे शुक्रवाः वनेगु का ।’

‘खः, कका खः, पक्का जि वयेगु जुल, नां च्वयादिसँ’
जिं धया ।

शुक्रवाः सुथय् न्हापं थःत माःमाःगु वसः, लाकां, नयेगु चिजबिज भचा व्यवस्था याना । रामसिंह ककाया फोन वल,
‘का तुरून्त वाःसा बसपार्कय् वनेगु टाइम त्यल ।’

जिमिगु आज्जुकथं इलय् हे थ्यन । थःगु भोला, ब्याग ज्वँज्वं यात्रा शुरु याना जिमिसं । भचा भचा थाक्यावल ।
त्यानुया वल । गुम्हं बुलुहुं बुलुहुं तँ गगं वन । जिपिं त्यानु नं लंके, च्या नं त्वने धकाः होटेलय् वना ।

च्या त्वँत्वं गफ यायां सिइदत - रामसिंह ककायात थाक्यावःगु खँ ।

त्वता थकेगु खँ हे मन्त । उखेथुखे याना क्वबिइत भरिया व दोकया व्यवस्था नं जुल । ज्याला नं क्वःछित । जिपिं बुलुहुं पलाः न्ह्याका । बीच बीचय् रामसिंह ककां भरियायात थ्व जुल, व जुल, थन स्यात अन स्यात धाधां दुख प्वंका तुं च्वन ।

स्वघौ ति लिपा द्यःथाय् थ्यन । सकसिगु ख्वाः चकं तर रामसिंह ककाया ख्वाः धाःसा खिउँसे, सातुपातु वंम्ह थें हे । उलिमछि तीर्थ यात्रा भायाः धर्म कर्म याइम्ह रामसिंह कका, छाया छु जुल छितः ? जिं न्ह्यसः तया ।

‘उलिमछि धेबा बियाहयाम्ह भरियाया ताल थ्व ला ?’
वय्कः जंगे जुल । बिइ फइमखु धाक्व धेबा ।



वसन्त नकःमि

अजू चाल जि । वय्-
कःया धर्मकर्मया खँ, दान पुण्यया उपदेश, न्हापांया खँ लुमलुमं इकुमकु धायावल ।

थुखें भरियाया विलाप व चःति प्याःगु ख्वाः खँखं जिगु मन क्वतुन । अले लुमनावल देवकोटाया म्ये ‘कुन मन्दिरमा जान्छौ यात्री, कुन सामाग्री पुजा गर्ने ... ?’ ●

गांगाया बाखं

गामय् साक्षरता अभियान पुचः चाहिलाचंगु दु धकाः हुइना भुइना वं न्यंगु ला खः । छन्हु सन्ध्या इलय् व पुचः वयागु पिलिचाय् तुप्लुक्क खने दःवल ।

सन्ध्याकालय् गाउँपालिकाय् गामय् च्वपिं तता केहेपिंत प्रौढ कक्षा चालेत्यंगु दु, छँया ज्याखँय् ततःमतः क्यनाः ब्वनेचवये मसःपिं छिकपिंत ब्वंकेत नां-धलः च्वःवयागु जिपिं । खला न्हिन्हं घौछि जक ई फ्याःसां गाः छिकपिसं । ज्याखँय् पंगः नं जुइमखु । पुचःयात फेतुनादिसँ धकाः इनाप हे याये मलाःनि इपिं भासँ न्है धया वनेत्यन ।

हस ! छगू बचं वय्कःयाके न्यना स्वये ! वं लिसः बिल ।

कन्हय्खुन्हु सन्ध्या ई जुयेवं हे जःलाखःला तताजुपिसं प्रौढ कक्षा वनेत सःतःवल । व नं इपिं नापं हे वन ।

कक्षा सुरु जूगु बाघौ हे मजानि, वया बुरा प्वाः स्यानाः अस्पतालय् ब्वाँय् वंगु खँ न्हाय्पनय् थ्यंकः वल । वया भाःत ग्याष्टिकया पुलांम्ह ल्वगि ला खत । वं कक्षा त्वःता हथासं अस्पतालय् थ्यंकः वन । व खनेवं वया भाःत भन् अय्या अय्या धाधां हाल ।

हानं कन्हय्खुन्हु नं छँया ज्याखँ क्वचाय्का सन्ध्याई जुयेवं जःलाखःला तताजुपिं नापं प्रौढ कक्षा वन । कक्षाय् फेतुनाः सफू हे पुइके मलानि, उखे थौं नं भाःतम्ह अस्पतालय् थ्यंगु बुखँ वल । व ब्वाँय् वना अस्पतालय् थ्यंकः वन ।

हानं कन्हय्खुन्हु सन्ध्या इलय् । न्हापा लिपा थें व छँज्यां लिमलाकाच्वन । प्रौढ कक्षा वनेत जःलाखःला तताजुपिसं सःतःवल ।



रत्न कोजू

लिबात खंला ! नु नु याकनं । जःलाखःला तताजुपिसं छप्वाः म्हुतुं धाल ।

मखु, आ जि वये मखुत । वय्कःयात हानं अस्पतालय् क्यंवनेमाली ! वं ख्वाः ख्युंका खखना सः वयेका धाल ।



जिम्ह हनुमानजि

जिमिथाय् त्वाल्य् चतुर्मास प्यला बहनि बहनि न्ह्याबलें
'खिछें महाजनया रामायण'[#] कंकीगु नेवा: भासं ।

गन रामायण कनी अन हनुमानजि मव:सैं मगा:, जन-
विश्वास थ्व । थ्व हे विश्वासं जित: हनुमानजियात छक: नाप
हे लायेगु जित: त:धंगु इच्छा जुल ।

उकिं सु जुइ व हनुमानजि धयाथें जिं बाखं न्यंवइपिं
फुक्क भक्तालुतय्गु चेवा कायेगु ज्या न्ह्याका ।

जिं चाल, धातयें छम्ह मनू दकले न्हापां वइगु । भुग्लुङ्ग
गां न्याया मिखा निग: जक खने दयेक बाखं न्यनाच्चनीगु । अले
बाखं कने सिधयेवं प्रसाद कया: व दकले लिपा वनीगु ।

बस, हनुमानजियात म्हसीकेगु लक्षण थ्व हे ला खत ।
दकले न्हापां वया दकले लिपा वनीगु ।

उकिं छन्हू बाखं न्यने धुंका: व लिहाँ वंबलय् जि नं वया
ल्यू ल्यू वना । साक्षातम्ह हनुमानजिया दर्शन यायेदइगु आहा !
गुलि न्ह्यइपुसे च्वनीगु जुइ व ई ।

तर जि ल्यू ल्यू व:गु सिया व याकनं याकनं वन । जि
नं याकनं याकनं वना । वं तत:पला: यात । जिं नं तत:पला:
याना । वं थ:गु पला: भन्भन् तच्चयेकल । जिं नं थ:गु पला:
भन् भन् तच्चयेका ।

छगू ख्युंगु गल्लिइ थ्यनेवं 'योमां ! योमां !' धाधां
चिल्लाय् मिल्लाय् दना: अन वं थन वं मदयेक व अलप जुल ।

जि हिस्स ! उबसांनिसें जिं वयात गुबलें हे मखना ।

अथेसां जित: विश्वास दु, श्री रामकथा श्रवण यायेत
अवश्य नं जिम्ह हनुमानजि अन न्हिन्हिं व: जुइमा: । बरु मनूया
मखुसैं पशुपंछिया भेषय् वइगु जुइका व हला ?



गोबिन्दमान श्रेष्ठ

[#] खिछें महाजनयागु = खप देशय् तसकं लोकं त्वा:गु श्री गणेशबहादुर कर्माचार्यज्युं च्याङ्मू गणेशकृत रामायण ।

छफुति छफुति लः

पत्रिका पुतुपुइकाच्चंम्ह जलदेवं क्वथीक क्वथीक छगू निगू बुखँय् छयं क्वक्वछुनाः छगःछगः आखःग्वलय् ध्यान तयाः स्वत । ससि मालेथें उखे नं, थुखे नं । ब्वयातःगु किपाय् नं चाचाहीका स्वत । वाक्की वयेकाः पत्रिका भ्वाक्क बस्वात । जुरुक्क दन । क्वथाय् इरुथिरू जुल ।

भमचाम्ह क्वथाय् दुहाँवल, 'का बा, च्या हया । ख्वाउँइ । याकनं भपियादिसँ ।'

च्या दिकाः वनेत्यंम्ह भमचित सःताः धाल, 'स्वःसा लक्ष्मी, मयल । थ्व पूगु च्या नं मयल दः । यकि । बरू ख्वाउँसे च्वंगु लः छगिलास हजि । जायेक तयाः हयाव्यु दः याकनं ।

लक्ष्मी वाताहाँ च्वन । न्हाचः जुतले, 'सय् भमचा, छं क्वाःक्वाःगु च्या छकः त्वकि । चिकुल । थपाले थ्व गजाःगु चिकुगु । तुतिताति हे ख्वाउँयाः हायावनी थें च्वनावल । च्या हे छगिलास त्वंसा म्ह छम्ह क्वानावइ' धाःम्ह ब्वाजुं हानं छगिलास लः हँ ।'

लक्ष्मीं छुं मथुल । जलदेव बुरायात स्वःगु स्वयां जुयाच्वन । 'छं खँ मथुनि लक्ष्मी । हुँ, धया थें या । तग्वःगु गिलासय् तया हिँ बरू च्वापुलः । याकनं ।'

लक्ष्मी स्वारास्वारा बैगलय् थाहाँवन । अबुजुया उजंकथं तग्वःगु हे गिलास जायेक लः तयाः लक्ष्मी हाकनं क्वथाय् दुहाँवल ।

गिलास काचाकिचां ल्हाती कयाः जलदेवं क्वथाय् पर्दा चीकाछ्वत; भ्याः चायेकल । छगिलासं लः हुँ थ्यंक छ्वाकाछ्वत ।

'छु यानादियागु बाःनं । पिने मनूतय्त लाइ' लक्ष्मीया काचाक्क हे न्यनेवल ।

'छं खँ मथुनि भमचा । भी थन चिकुयाः लुमुकाच्वना ।



मथुरा सायमि

उखे स्व, अष्ट्रेलियाय् मि च्यानाच्वन । स्यानां स्याये मफयाच्वन । करोडौं जीवजन्तुत भनाः सिना वनाच्वन । क्वाःगु फसय् सासः ल्हाये थाक्याः मनूत भःभःमिनाच्वन । वाथावाथा कनाच्वन । थ्व उगु मुलुकय् प्वंकागु लः का' आवेशय् जलदेवया म्हुतुं खँग्वः पतपत तज्यानाः वयाच्वन । लक्ष्मी भन अजूचाल । थये अथे धाये

आइडिया

कलाःया न्ह्यःने वं थःमांयात उलि हनाबना मतः । छुं ज्याजि स्यंकूसा ब्वः नं ब्यू । थःभाःतया व्यवहार खनाः कलाःम्ह लय्ताः । कलाःया निंतिं हे बाध्यतां भाःतम्हसिनं थथे व्यवहार क्यनाच्चंगु खः ।

छन्हु कलाःम्हसिया मां उमिगु छेँय् वःबले भाःतम्हसिनं कलाःचिया मांयात नं वया मांयात थें हे व्यवहार याइ । थ्व खनाः कलाःम्ह तंचाइ । छाये थथे यानागु धकाः कलाःम्ह हाली । लिसलय् भाःतम्हसिनं न्यंकी, 'जिमि मांयात हकीबले छन्त न्ह्याइपुसे च्वं । छं मांया छुं धायेबले छाये छं कपाः स्यात ?' कलाःम्हसिनं लिसः मब्यू ।

उल्सानिसें कलाःचिया मन तयेत थःमांयात ब्वः बिइ म्वाल ।



अनिश शाक्य

मफयाच्चन ।

जलदेवं खँ स्वाना हे यन, 'तन्त्र मन्त्रय् विश्वास दु ला छं, भमचा ? न्हापा छकः ल्हासाय् च्वनाच्चंम्ह सुरतबज्रं छु याःगु स्यू ला छं ? वं येँय् थःगु छेँय् मिं नःगु सीकाः अनं हे च्या फू फू यायां मि स्यानाविल । दन्त्यकथा थें जूवन, आः । जूसा जुइ ला छू छु धकाः असफल प्रयास सां यानागु जुल जिं । मि स्यायेत लः ला अन यक्व हे मालाच्चन । लः यक्व त्वनाः फुकीन धकाः ग्यानाः अनं च्वपिं द्रलद्रः उँठतय्त गोलिं कयेकाः स्यात धाल ।

उ, अन पत्रिकाय् च्वयातःगु दु ।'

'धात्थें खः ला बाः ?'

'अल्लु । मखयेक धाइ ला । उकिं आः भी फुक्कं छप्पं जुइमाःगु दु । देशय् दक्व मनुखं छगिलास छगिलास जक सां लः अन प्वकः वनेफुसा भीसं स्यायेफु; व मि सीफु । समुद्र धयागु हे छफुति छफुति लखं हे मखा वनय् जुयाच्चंगु । ग्व, थूगु सुनां ?'

जलदेवं ल्हाः निपां पुत्तुपुइकाः हाल ।

लक्ष्मी वाताहाँ च्वंम्ह च्वनं ।

त्वमिया रखा:

पासापिं सकलें साहित्यकार जूगुलिं हसनाया नं मन मच्चन । सःसःथें च्वल । उगुंथुगुं सफू ब्वन । पासापिंके सल्लाह काल । वं बाखं च्वल । वया पासायात क्यन ।

‘गथे च्वं ?’

पासां बाखं ब्वन । ‘थुकिइ बांलाके ज्यूनि । छता निता कल्पनाया खँ तनाब्यु । बाखं चत्त च्वनी ।’

हसनां पासां धात्थें कल्पनाया खँग्वः तनाः भिंकल ।

मेम्ह नांजाःम्ह छम्ह साहित्यकारयात क्यन ।

‘जिगु कुतः छकः स्वयादिसँ रे सर ।’

सररर ब्वन । ‘बाखं बांलाः । थ्व भवः तप्यंक धायेगु पलिसा साहित्यिक खँग्वः छ्यःसा अभ्र बांलाइ’ धाधां मिलय् यानाबिल । हसना दङ्ग जुल ।

थःगु कापीइ बांलाक ल्ह्यल । अले मेम्ह लोकं त्वाःम्ह साहित्यकारयाथाय् वन ।

‘सर जिगु बाखं गथे च्वं ? मगाः मचाःगु छकः कुलाः बियादिसँ रे ।’ बाखं बिल ।

ध्यान तयाः स्वल ।

‘बाखं तसकं बांलाः नानी । थुकिइ भचा विम्ब तनाबिइ का । अले लुँइ नस्वाः दुगु थें जुइ । विम्ब तनाबिल । खालिगु पेन्टिङ्गय् रङ्ग जाःगु थें बाखं बांलात ।

हसना लय्ताल । सुभाय् बियाः लिहांवल ।

आः हाकनं वं मेम्ह साहित्यकारयात क्यन ।

‘सर, जिगु न्हापांगु कुतः गथे च्वं ?’

‘अय् ! छिं नं बाखं च्वयादिया ला ?’ पुत्तुपुइका स्वल ।

ओहो ! गजब बांलाः । न्हूम्ह हे धाये मत्वः । थुकिइ सकतां दु । आः थुकियात भचा न्हूगु शैलिं प्रस्तुत याः । छिगु शैली नं बांलाइ । वं बांलाक शैली छ्यलाबिल ।

हसना दङ्ग जुल । आः व धुक्क नक्सां बाखं गोष्ठीइ



विमलप्रभा बज्राचार्य

ब्वति काःवन । बाखं ब्वन । सकसिगुं पाः सिधयेवं समालोचकं समीक्षा यात ।

‘थौं ब्वंगु बाखं छपु निपुइ मगाः मचाःगु त्वःताः थःथःगु कथं बांलाः । थःथःगु पह दु । मय्जु हसनाया ‘मुखूस्वां’ बाखं तसकं बांलाः ताल । हसना मुसुमुसु न्हिलाच्चन ।

‘वय्कःयागु बाखनय् नांजाःपिं थीथी साहित्यकारपिनिगु ख्वाः पिलूवः तर वय्कःयागु हे ख्वाः धाःसा गनं मखना ।’ हसना वाताहां जुल । बिचाःयात, ‘थम्हं च्वयागु बाखं खः । थः उकिइ छाय् मदु धाःगु जुइ ?’ ●

जि मां भाय् मसः

मच्छे नारांघः दर्शन याना छैय् लिहां वने न्ह्यः च्या
छकः त्वना जक वनेगु तातुना छगू होटेलय् दुहां वना !
ल्याय्मह पसल्यां न्यन, 'छु भपिया दीगु थें तःबाः ?'

'च्या दु ला ?'

'दु !'

'च्या निगू दय्कादिसँ !'

'च्या नाप मेगु छुं?'

बाताय् च्वंगु मनातःगु छैय् मिखा वन ! तिरिमय्जु ला
खाया छैय् मनइमह ! छैय् छगः जक कया ! च्या मदातले मेपिं
सुं गाहाकीत मदुगुलिं पसल्या नापं उखेथुखेया खँ जुयाच्वन !

जि व पसल्या नाप खँ ल्हानाच्वनागु, तिरिया मयल
ला मसिउ ! तीजक लहाः हयाः जिगु प्वाथय् प्याकुतिं न्यात !
शायद म्वाः मदयेक हालाच्वंगु थें ताल जुइ वयात !

च्या दाल ! च्या त्वना ! 'गुलि जुल' धकाः न्यना !

'च्या निगूया स्वीतका ! छैय् छगःया नीतका ! न्यय्तका
जुल तःबाः !'

थौकन्हेया मस्तय्सं बीस, तीस व पचास मधार्सें
नीतका, स्वीतका व न्यय्तका धाःगु न्यना जि अजूचाल !

'ओहो ! गुजाःगु शुद्ध नेवाः भाय् ल्हाःगु ! थथे हे थःगु
मां भाय् प्रति मतिना दयाच्वनेमाः न्हि बाबु ! तसकं लय्ताल
जि ला !'

वं धाल, 'व ला खः ! तर छु याये ! जिं थःगु मां भासं
ला १५ नं धायेमसः तःबाः !'

'मखु, मखु ! छं ला थुलि बांलाक थःगु मां भाय् ल्हाना
हे च्वंगु दुनि ! जिमिथाय् उखे च्वपिं ला भचा हे मसःपिं दु !'

जिं थुलि धयावले वं बिउगु लिसः न्यनाः जि ला
वाताहां जुल ! व छम्ह नेवाः मखुसें मगः (मगर) या मचा
जुयाच्वन ! ●



ज्ञानीराजा मानन्धर

भंगः

आः अथे मखु, थ्व निगुलिं देय्यात छगू जक देय् दय्के माल । जनतां तसकं दुख सिल, निगू देय् ल्वापु जुयाः ।

ज्यू नि जिगु नं थ्व हे बिचाः खः ।

अले जुजु सु जुइगु ले ?

भी निम्हं जुइगु का, आखिर भी निम्हं थःथःगु देय्या जुजु हे खः थें ।

जनता माने जुइ ला ? थथे निम्ह निम्ह जुजु जुइबले ?

मखुसा पालंपाः जुजु जुइगु का मज्यू ला ?

पालंपाः ?

खः पालंपाः । न्यादँ न्यादँया लागिं जुजु जुइ का मज्यू ला ?

अथे खःसा न्हापां जि नि जुजु जुइ । जि छिगु सिबे तःधंगु देय्या जुजु खः । अथे जूगुलिं जि हे न्हापां जुजु जुइ दयेमाः ।

अथे धयां गन ज्यू धकाः, जि वनां न्हापां जुजु जुइ । निगू देय् छगू हे यायेगु प्रस्ताव हःम्ह छि हे खः व प्रस्तावयात सहमति जिं बियागुलिं जि हे न्हापां जुजु जुइ दयेमाः ।

अथे खःसा ल्वापु ख्यापु मदयेक Toss यायेगु ।

ज्यू ज्यू, जिं Head कायेगु, छिं Tail ।

मखु जिं Head कायेगु, छिं Tail ।

मखु जिं Head कायेगु, छिं Tail ।

जुजुपिनिगु खँ न्यनाच्चपिं जुजुया बडिगार्डतय् खँ जुल, 'जाबा Toss यायेगु खँय् ला मिले जुइ मफुपिसं देय् गथे याना मिले जुयाः चले याइगु खः ग्व ।'

ज्यू ज्यू, जिं Tail कायेगु, छिं Head हे कयादिसँ ।

Toss यात Tail । Tail काःम्ह जुजु हे दकले न्हापां जुजु जुइगु जुल ।

जनता जकं माने जुइगु खःला मखु ग्व ? जितः ला ... ।



रबिन श्रेष्ठ

● चिबाखं

- ध्रुव मधिकर्मि

थासय्

लँय् ल्वहं छगः ।

अन जुयाच्चपिं मस्तय्सं थुखें उखे , उखें थुखे ल्वहंकुचा
थ्वानाच्वन । म्हिताच्वन । उमि निति व ल्वहंकुचा न्त्यइपु
छ्यायेगु ज्वलं थें । लँय् लानाच्चंगु ल्वहं थ्वाये खनाः उमि
ख्वाल्य् न्हिला व न्त्यइपु पिज्वयाच्वन ।

लाकमं थ्वाका, गबलें उखे सा गबलें थुखे अंगलय्
न्याना ल्वहंकुचा थी थी बां कयाच्वन । गनं हेत्तात, गनं कुचा
दलावन, गनं ज्यलाच्वन । व हे लँय् जुयाच्चंम्ह छम्ह ल्याय्म्हं
ल्वहंकुचाय् लुफिं हाना ग्वारातुली भयं हाचां गायावन ।

तुतां चुयाः लँय् वयाच्चंम्ह छम्ह ज्याथ मनुखं व
ल्वहंकुचा कयाः थःगु छेंय् यंकल । उकियात यचुक सिला
पुजाक्वथाय् थापना यात ।



ध्रुव मधिकर्मि

आः न लँय् थासय् मथ्यंगु ल्वहंकुचा दनी ।

ग्यानादीम्वाः, छिं छिगु जनतायात
ह्ययेकादिसं, जिं जि जनतायात ह्ययेके ।

ज्यू का ज्यू जिं कुतः याये ।

तःधंगु देय्या जुजु हे न्हापां जुजु जुल ।
जनतां उम्ह जुजुपाखें यक्व हे आस यात । निम्हं
जुजु छपं जुयाः ज्या याइ । देसय् शान्ति वइ ।
देश विकास जुइ । लः तक हे बांलाक त्वने
मखनाच्चपिनि लः त्वनेखनीगु जुल । नये मखपिनि
नयेखनीगु जुल । थःगु हे देशय् ज्या दइगु जुल ।
विदेशय् ज्या याः वनेमाली मखुत । जनताया छेंय्
डोजर हयाः छें थुनी मखुत आदि आदि ।

तर जनता आसं द्यात । न्हापाया जुजुं

थें हे जनताया छें थुनेगु हे यात । देय् विकाश
यायेगु सिबें जुजुया आसेपासेतय्गु भंगः जक
तग्वः जुल । भूमाफियातय् रावणया थें भिगः
छ्यं दयावल । न्हून्हुगु नियम कानून हल ।
आसेपासेतय्गु खं न्यनाः धर्म संस्कृति स्यंकेगु
ज्या यात । थ्व जुजुं नं जनतायात भंगः लायेगु
हे ज्या जुल ।

जनताया सह यायेगु धैर्य मदयावन ।
जनता फुक्क बुलुमि थें ग्वानावल । जनताया
सः थ्वयावल । सतकय् जुजुया विरुद्धय् नारा
थ्वल । ...चोर देश छोड ... चोर देश छोड ।

जैला लप्ते

स्वन्तिया लक्ष्मीपूजा खुन्हु, जिमि अब्बा हालाच्चन,
'लक्ष्मीपूजा यायेता जैला लप्ते व तःसि छगः मदयेक मज्यूगु ।
अय् बाउचा, छमिसं वास्ता हे याये मखुत ला ? छमिता
नयेदसा गात ल्हा ? जि छम्हा मदयेवं छमिसं चालचलन हे
दक्वं त्वःतिपुं जुल ।'

'जिं माल हये हे हये नि अब्बा, छ म्हाय् सुख मदुम्हा
मनू छाया् हालःचवडागु ? जैला लप्ते मरुसा केरामाया हलया्
पूजा याःसां मज्यू ला या ? तःसि मरुसा आमाःसि तयो पूजा
याडा छु जुइ ? थ्व अब्बाया नं भ्वासि हे चर्को क ।' जिं भाःचा
तं चाया थें अले भाःचा ह्ययेके थें धाया ।



बाबुकाजी सुवाल

'आम्थे हे धःगुलिं खः - भीगु चलन दक्वं तड वांगु ।
मुतुमारि सुनां न मछुयेधुंकल । थःगु नखाःचखाः धमाधम
त्वःत, कर्पिडु नखाः डायेक हल । भ्यालेन्टाइन डे हँ, क्रिसमस
हँ, छु छु ? खालि नयेगु त्वहः जक यात । परम्परा म्वाकः
तयेगु कुतः सुनां हे यःगु मखुत अः यां ।' अब्बा जिगु खाँ हे
मन्यंसं हालं तुं च्वन ।

बुराम्हा अले म्हाय् सुख मरुम्हा जि अब्बाया मन
तयेता जूसां तःसि व जैला लप्ते माले धकः छेंतं पिहाँ वड
छ्वया । लुइके फइगु खः ला मखु धायेगु खाँय् जिगु नुगलय्
धौबजि वालच्चन ।



११४० पोहेलाथ्व द्वितीया
(२०७६ पुस १२ शनिवाः)

● चिबाखं

- सुनिल बज्राचार्य

देशया खाःपाः

जिं रामचा खना ।

- वं गाडी न्यात

- जहान परिवारपिन्त ज्वाँय् ज्वाँय् तिसा तिकल

- थिके थिकेगु वसः पुंकल

धाये भौतिक सुविधां वं थःत परिपूर्ण याना जुल ।
करोडौं ध्यबाय् व म्हिताच्वन ।

जिं हरिचा खंकाच्वना

- चिकू सह याये मफयाः थुरुथुरु खाकाच्वंम्ह

- म्हय् छजु लुमुक पुने मखंम्ह

- क्वाक्क नये मखंम्ह

धाये अभावया दसु जुयाच्वन हरिचा ।

अले जि चिल्लाय् दंक हालाच्वना -

‘रामचात म्वाइगु हरिचात सिइगु जिगु देशया
नियति खः गन करोडपति रामचातय्सं हरिचातय्त म्वाकेत
सच्छि, ध्यबा दान बिइत नं नुगः स्याका थःगु ‘गरिबी’ उलाः
चवनी ।’



सुनिल बज्राचार्य



द्यः

द्यः ताबे तक भागि यानाच्चनिगु वयागु पह खना: वया काय् व भमचा निम्हं दिक्क चाल । छन्हु भमचाम्हेसिनं वयाके न्यन, 'बा छिं न्ह्याबलें द्यः ताबे तक भागि यानाच्चनिगु, छु बरदान फवना दियेगु ले ?'

'छिमिगु हे भिं जुयेमा धका: फवनेगु का थुल ला ?' वं थःगु मनया खँ न्यंकल ।

बौया खँ न्यना: काय्म्ह असन्तोष जुया: न्यन, 'बा छिं द्यःयात भक्तिभाव तया: धर्म, कर्म, पुजा, प्रार्थना, भजन कीर्तन यानाच्चंगु तःदँ हे दयेधुंकल, ग्वः द्यवं छु बिल ले भीत ?'

'खः पुता ।' वं काय्म्हेसित थुइके थें धाल, 'भी मेगु ज्या छुं हे मदु । अय्ं भी द्यालाना च्वनेमा:गु नं मदु । बुँया उब्जनी हे नयेत्वने पुनेत गा: हे गा: ... ।'

बहन्हि निम्ह तिपूसिया सल्लाबल्हा जुल । 'धात्थे खः । वा, छ्व पिइगु बाहेक भी मेगु लजगा: छुं हे मदु । पासापिनि गुम्हसियां जागिर दु, गुम्हेस्यां व्यापार व्यवसाय दु । अय्जुया पासापिनि सुख भोगय् च्वनेदु ... । अमि न्ह्यः मवल । भीथाय् भिंनिदँया छकः लच्छि, तक जुइगु मेला कन्हेसं निसें शुरु जुइ । वं काय् व भमचायात सम्भय् याकल ।

'जि लच्छि, तक हे लिलाइ मखु । न्हिया न्हिथं कुण्डय् म्वःल्हुइमाल । भजन यायेमाल । पुजापाठ यायेमाल । मेलाया कुण्डय् म्वःल्हुइबले पुण्य लाइ धका: तापाकं निसें लखंलख मनूत वइ । छपिं नं कुण्डय् वा न्है ।'

निम्ह तिपुलिं कुण्डय् म्वःल्हुवन । लिहां वःबले निम्ह मिलय् जुया: अन च्वंगु भराय्ग्वःगु ल्वहं छगः कुबियाहल ।

व ल्वहं इमिसं थःगु बुँइ स्वन । सफा यात । अबिर इल । सिन्हः तिकल । स्वां छाल । स्वांमालं क्वखायेकल । किगलं पुजा यात । द्यःया प्रतिरूप प्रतिस्थापन जुल ।



हरिगोबिन्द भोमि

व ल्वहं मेलाया कुण्डय् वनिगु लँपुइ ला:गु जुल । मेलाय् वःपिं भक्तजनपिसं व ल्वहंयात नं द्यः भा:पिया पुजा याना दक्षिणा छाया: वनेगु यात ।

मेला सिधयेका लखं लख दक्षिणा स्वया: दइ जुयाच्चपिं काय् व भमचायात वं धाल, 'का मब्यु ला द्यवं ।'



● चिबाखं

- ईश्वरीमैयाँ श्रेष्ठ

न्हयःया वासः

मांबौया माया मतिनां ब्वलंम्ह भाग्यमानीम्ह सुलभया ब्वनेबिने सिधयेका जागीर छगू नं बांलाःगु थासय् हे दत । जीवन सुथां लाक न्ह्यानाच्वन । छन्हु सुलभया दोमन जुल । थौकन्हेया इलय् ध्यबा कमे यायेगु नं छगू मू ज्या ला खः । तर ध्यबां हे ल्हाक्क धाःसा कमे यायेगु त्वःताः चूमलानीगु । छन्हु दच्छिया कमाइ बराबर ध्यबा दइगु ज्या चूलात । सुलभया दोमनया कारण थ्व हे जुयाच्वन । ध्यबा ला वइगु जुल, गाक्क हे तर मनं भचा व ज्या यायेत मन्ह्याकू । छु याये छु याये जुयाच्वन । ध्यबा कमे यायेगु थ्व मौका त्वःते मज्यूथें छखें च्वना वल धाःसा मनं तप्यंक थ्व ज्या यायेत बचं मबियाच्वन । ध्यबा व ज्याया दथुइ हुसुलुं पुया छुं हे क्वःछिइ मफयाच्वंम्ह सुलभं कन्हय् कुन्हु सुथय् चिया त्वंत्वं मांम्हनाप खँ ब्याकल ।



ईश्वरीमैयाँ श्रेष्ठ

‘यःमां, छगू ज्या वयाच्वंगु दु । ध्यबा ला गाक्क हे वइगु तर जिगु मनं मबियाच्वन । छु यायेगु ?’

मांम्हेसिनं धाल, ‘बाबु जि यक्व आखः ब्वनातयाम्हा ला मखु । जिं सिबें छं हे स्यू तर ... जिं छन्त सुथय् थंवयेबलय् छं याउँक न्ह्यःवयाच्वनीगु खनाः जितः तसकं चितासू दयाच्वनीगु । आः थथे मजुइमा कि जिं छन्त थंवयेबलय् छं न्ह्यः मवया वाथावाथा कनाच्वंगु खनाः जिगु चितासू तनी । यद्यपि छन्त थने हे म्वायेक छं न्ह्यलं चायाच्वनी । अथेसां ...’

सुलभं धाल, ‘यःमां, मांनं धाःगु खँ थुल जिं । मांयात चितासू मदयेक न्ह्यः मवइगु ज्या याये मखु ।’ म्हिगः बहनी तक छु याये छु याये अन्तरद्वन्द्व जुयाः वाथावाथा कनाच्वंम्ह सुलभया मन कपाय् थें याउँसे च्वन ।



विष

नकतिनिया नच्चागु उमेर । चञ्चल मन । जिगु हे तगिमय् थुगुसि भर्ना जूवःम्ह व । शालिन, शान्त व सुन्दरम्ह धकाः म्हसिइकेत सुयातं थाकु मजुल । बेदाग व निर्दोष !

मिजंमचाया चञ्चल भःभः मन जिगु । मेसेञ्जरय् वयात खनाः फी मफुत । च्या - 'हाइ ।' लिसः मवः । छ्वाः लिपा हानं च्या । थुपाले त्वह तयाः क्लासय् अब्सेन्ट जूबलेया होमवर्क फवनेगु । लिसः वल होमवर्कया रूपय् ।

बिस्तारं खँ ब्यानावन । लच्छि, निला, स्वला, प्यला । आः वं थम्हं हे खँ ल्हाःवयेगु यानाहल । जि मक्ख । च्या बिया - 'आई लभ यु ।' तन्हु लिसः मवः । हानं च्या । लिसः वल । न्या जालय् क्यन ।

गुंगू तगिमय् तिनि ब्वनाच्वनाम्ह जिं छु स्यू ? छु धाये वा याये ज्यू मज्यू । दः सुयां निगरानी मदु । अभ् मिजंमचा धकाः थज्याःगुली सकभनं हौसला हे महसुस जू । स्वःस्वःपिं स्वःस्वःथाय् सकसियां ल्हातिइ मोबाइल, इन्टरनेट । सकलें थुकिइ लिप्त । थौकन्हे थ्व हे स्मार्ट जुइगु आधार खः, सखे ।

जि छँया तःधीपिनिगु तरिकां खँ ल्हायेगु जुयावल, निस्फिक्री व स्वच्छन्द कथं । तसकं अनौपचारिक व बेलगाम जूसेलिं फोटो छवया हति धया जि दाइचां धात्थें । जुजुं सेक्सी पोज व अर्धनग्न फोटो छवयाहयेत ग्वाका । वं नं धाःधाःथें फोटो नं छवयाहल । नसां कःम्ह इमा थें वं नं दः फलो यानाहल । छन्हु जक च्याद् याये मखंसां वाथावाथा कनीगु धयाहल । न्हापांगु जाँचय् हे सकलें टिचरपिनिगु मिखाय् लाःम्ह व, थुपाले पास जक । न्याथाय् स्वःसां, न्याथाय् न्यंसां - लभ ! लभ ! लभ । डेटिंग ! डेटिंग । थुपाले च्याबिया - 'विल यु म्यारी मि ?' भुमिं यंम्ह, लँ दापा जूम्ह, अबोध व । लिसः प्रष्ट जू, विषं पूर्वक कायेधुंकल खनिं ।



शाक्य सुगत

विषय् होश तंम्ह वयात होशं थनेत वया मांब्वापिसं तसकं हे कष्ट यायेमाल खनिं । विषया असर लिपा दंम्ह व आः हानं विषय् लाइ ला, जि मनमनं मुसु कायाः स्वयाच्वनागु दु । छु याये, आखिर विष नं लात जि !



● चिबाखं

- न्हुछेभक्त कवां

बुखँ

विकाशया नाय्खिं च्वय्का गांगामय् डोजर वया: लँ दय्क वल । लँ जक छु दत अन मोटर, मोटर साइकल आदि सवारी साधनया भवःभवः नं वल ।

स्वस्वं हे व थाय्वाय् शहर जुल । सरकारं उकियात नगरपालिका यानाबिल । गां नगर जूगुलिं जनतातय्सं हर्ष बधाइ यात ।

लँयात बस्ती बस्तीया मनूतय्सं थःगु लगापाता: त्वःताबिल । लँ ला मायाबी घटोत्कच थें भं भं तब्या जुल । उकियागु मापदण्ड नं अप्वयावल । न्हूगु मापदण्डं पुलांगु बस्तीया यक्व हे छेंखा मापदण्डय् लात ।

छन्हु सरकारं सुचं पिकाल - 'लँया मापदण्ड त्यला दय्कातःगु छें, पसः, टहरा, पःखा: स्वीन्यान्हया दुने थम्हं तुं थुँ । अथे मथुन धाःसा सरकारं डोजर हया: थुनाबिइ । उकिया ज्याला सरकार बक्यौता सरह असुल याइ ।'

छन्हु धात्थें सरकारं डोजर हया: लँया जवय् खवय् च्वंगु छें थुनाबिल ।

सडक विभागं थःथःगु छेंखा थुंकाच्चपिं मनूतय्सं बहनि सरकारी रेडियो व टिभिं बुखँ न्यन, 'फलाना फलाना थाय् लँया मापदण्ड त्यला: दय्कातःगु छें सडक विभागं थुनाबिल ।'

लँया मापदण्ड अप्वय्कूगुलिं थःथःगु छें मदय्काच्चपिं मनूतय्सं अःखः बुखँ न्यना: धाल, 'अहो सरकारं नं गुलि मखुगु खँ ल्हायेसःगु !'



न्हुछेभक्त कवां



ब्वना-पौ

छम्ह साहित्यिक पासाया काय्या कय्तापूजाया ब्वना-पौ वल । वया दाजु नं कलेजय् नापं ब्वनाम्ह जूगुलिं साहित्यिक पासायात जिं किजा हे धायेगु । निम्हेस्यां काय्पिनि कय्तापूजाया ब्वना-पौ छँय् त्वतातल ।

पासा छँय् वःबलय् जि पिहां वनाच्चनागु पाःलात । छँय् थंकाः ब्वना-पौ पुइकाः स्वया । ब्वना-पौ ब्वँब्वं छखें तं पिहां वलसा मेखें न्हिले नं मास्तेवल ।

नेवाः साहित्य ख्यलय् छगू बिस्कं नां दयेधुंकूम्ह साहित्यिक पासाया ब्वनापतिइ खँय् भाय् छयलातल ।

इमिथाय् छँय् इमिगु ब्याहां निसें कयाः थी थी लसता भव्य न्याय्कु, तर ब्वना-पौ न्ह्याबलें खँय् भासं छवयाहइगु ।

जिं पासायात बरोबर धायेगु नं याना, 'थ्व ला मजिल नि भाइ, छिमिथाय् भव्य वइपिं अधिकांश धया थें नेवाःत हे खः, ब्वना-पौ जक छाय् खय् भासं ?' पासा फिसिफिसि जक न्हिली ।

लिपाया भवजय् ला नेवाः भासं ब्वना-पौ वइ ला धकाः आशाकुति जुयाच्चने । तर जि न्ह्याबलें आशां द्या ।

उमिके नेवाः भासं ब्वना-पौ छापय् यायेमाः धयागु चेत हे मवः । आशां द्याःम्ह जि, उकिं थुगुसिइ भवजं नं आशां द्याकेगु बिचाः याना । इमि काय्पिनि कय्तापूजा भवजय् जि मवना ।

इमिगु भव्य बहिष्कार यानाबिया ।



महेश 'लँजुवाः'

● चिबाखं

- उद्धव मास्के

मनू म्हसिल

न्त्याबलें कुसा ज्वनाजुइम्ह जि, मौसम पूर्वानुमान
महाशाखां थौं द्यः चकनी धाःगुलिं कुसा ज्वना मवना तर वा
वया चौपट बालं दायका लँय् लुरुलुरु वयाच्चना । लँय् पासा
छम्ह ध्वदुक्क नापलात । दः खनेवं बडो आत्मियतां जिगु ल्हाः
निपा ज्वनाः धाल, 'छ नापलाःगु ला द्यः हे नापलाःगु थें जुल ।
दः ध्यबा भतिचा मदयेक मजियाच्वंगु । काय्यात क्याम्पसय्
भर्ना यायेगु कन्हय् अन्तिम न्हि । का रे छं ग्वाहालि यायेमाल ।'

'जिके ला ध्यबा मदु स्यू ।' जिं थःगु यथार्थता कना ।

'अथे धायेमते ले । करजोर बित्ति ।' जिगु ल्हाः भन्
कस्सिक ज्वनाः धाल । वयागु पहः खनाः कन्नाचायापुसे च्वन
तर धात्थें थःके दुगु हे मखु । उबले म्हिगः जिगु बुदिया लसताय्
न्त्यागुसां न्या धकाः विदेशय् च्वंम्ह म्ह्याय् नं सच्छि डलर बैकं
छवयाहःगु भस्स लुमंसे वल ।

'का अयसा कन्हे छंत भिद्वः दां जिं विइगु जुल ।' थुलि
धया जि वया छवया ।

कन्हे जुयाः नं वा वये मच्चूनि । अथेजूसां नं पासाया
आपत लुमंका बैकं ध्यबा लिक्नाः छँय् थ्यंक वनाः ब्यूवना ।

व लयता ला मता ला जिं मसिल तर जि तसकं
लयताया । फूचाःगु ग्वाहालि यायेबले गजबगु हे आत्मसन्तुष्टि
वइगु खःनि ।

लच्छिं लित बी धाःगु । लच्छि वन - मब्यू निला वन
- मब्यू । जुजुं दच्छि दत - बीगु खँ हे मदु । आः ला खंसा नं
मखंछु याइम्ह जुल । छँय् वंसा - दुसां नं मदु धाय्केविइगु
यानाहल । मोबाइलं फोन याःसा नं ल्त्वनीगु मखु । जुजुं निदँ
फुत । गाँठ भी गुमाना पागल भी बन्ना धयागु धापू चरितार्थ
जूगु थें च्वन दः । पासा नं मदु, ध्यबा नं मदु । अति हे जुयाः
छन्हु मोबाइलं मेसेज छवया, 'मनूत म्हसिइकेत गुलि दुख



उद्धव मास्के

सीमाः गुलि ध्यबा फुकेमाः धाइ
तर छंगु कृपां जिं अथे छुं
यायेम्वाल । भिद्वः दामं अःपुइक
मनू म्हसिल । छंत यक्व यक्व
सुभाय् ।'

म्हगस

वं ज्या यायेगु मतिइ तल ।
ज्या यायेत ध्यबा माः, ध्यबा चूलाइगु गनं ?
यक्वसिया सल्हा साउती लिधंसा कयाः वं बिचाः यात
- बुँ छपी दु व हे बुँ मिइगु खःला ?
- कि ... मखुसा थ्व बुँ हे बहः तयाः त्यासा कायेगु ला ?
- कि ... पिने विदेशय् पिहां वने, पिने वनेत नं बुँ
ममिइसें मगाः ?

वया मनय् धौबजि वालाच्चन !

वं निश्चय यात बुँ मिइगु, अले पिहां वना तन्न
कमय् यानाहयेगु अले हानं फूसा व हे बुँ मफूसा मेगु बुँ न्यायेगु
क्वःछित !

- वं बुँ मिल, अले पिने विदेशय् वन
- वं मेहनत यात, नसें मनसें
- चःति हायका वःगु ध्यबा मुंकल !

दँदं बिइधुंकूसेलिं स्वदेश वयेगु बिचाः यात !

वं थम्हं कमे याना मुंकागु ध्यबा दक्वं प्वःचिना, थः
विदेश वने न्त्यः म्हंकागु म्हगस साकार यायेगु हानं म्हगस
म्हंकल ।

व लिहां वल !

- वयागु स्वदेशय् आः बुँ मदु, छैखा सयका तयेधुंकल
- खुसी लः मखु, मनू खुसि जुयाः न्त्याःवनाच्चंगु
खंकल ।

वं थःगु बुँ स्वःवन, प्लटिङ्ग याना व्वःव्वः थलातःगु
लुइकल !

वं उकिया मू न्यन,

न्यनाकथं व थाराक्क न्हल

वं थम्हं कमय् यानाहयागु ध्यबा लुमंकल



नरेश अमात्य

- वं छव्वः बुँ न्यायेगु
क्वःछित !

वं थथे थःगु म्हगस
पूवंकल !



● चिबाखं

- कृष्णभक्त बोडे

रेमिट्यान्स

वय्कःया थुरर खाःगु ल्हाः बैकया क्यास काउण्टरया
न्हाय्कया ग्वःलाःगु प्वालं दुछवया दांप्वः टेबुलय् तया धयादिल,
'थ्व दां फुक्क जिगु खाताय् मुंकाः बियादिसँ ।'

'थुलिमछि दां गनं हया दियागु, गनं वःगु ?' बैकया
स्टाफं न्यन ।

'छंत छाया माःगु ? जिं न्ह्याथाय् नं हःसां वःसां !
खुरूक्क जिगु खाताय् मुंका ब्यूसा गा हे गाःनि ! नातिकुति हे
अप्वः का !' वय्कलं ही चाया धयादिल ।

'मखु अंकल ! अथे मखुत ! न्हापायाथें आः अःपु
मजुल । नियम पात । आयश्रोत क्यनेमाः का आयश्रोत ।
आयश्रोत मक्यंक दां दुकाये मजिल । थुलिमछि दां !'

वय्कःयात ध्वाथुइक कने थें बैकया स्टाफं कनाबिल ।

'का अथेसा ध्वाथुइका न्यना च्वं, 'थ्व दां फुक्क काय्
मियाः किस्ताबन्दी वःगु दां का दां ।' ल्हाःतुति थुरर खाकाः, ख्वाः
च्याकाः तमं हीमी चाया वय्कलं धयादिल ।

'मखु गथे किस्ताबन्दीं दां वइगु धयानि ! मथुल जिं
ला !' बैकया स्टाफं अजूचायाः हाकनं न्ह्यसः छुत ।

'छु तालयापिं थुपिं । कुत्तुकुला छगू छगू धया थें
न्यनेमाःपिं ! का छिमि नं थथे दांप्वः मुने मंदुसा काय् म्हायापिं
सदायात च्यः तये छवयेगु का अमेरिकाय् ...! अमेरिकाय् ... !



कृष्णभक्त बोडे

लिच्चः

छयं तज्याः, हिया हि जक । थुज्याःगु अवस्थाय् वःम्ह
काय्यात बुद्धि साहुनं न्यन, 'छन्त छु जुल, धा ! सुनां छु यात ?'
मिखां ख्ववि हायेका काय्म्हं धाल, 'जितः रामेचां अप्पां
कयेकल ।'

बौम्हेस्यां न्ह्यसः तल, 'सु रामे ?'
काय्म्हेस्यां लिसः बिल, 'व हे पौडेल बाज्याया काय् छु ।'
'छं छु यात जुइ । वा, नु जिनाप ।' तंम्बःम्ह बौ
काय्यात ज्वनाः पौडेल बाज्याया छैय् थ्यंकः वन ।



'स्वइदिसँ, बाज्या ! छिम्ह काय्या करामत ।' साहुनं
पौडेल बाज्याया ख्वाः स्वयाः हाल । ग्याःचिकुं थिउम्ह बाज्याया
म्हुतु मसं । लिपा आपुलुं नवात, 'तंचाया दिइमते, साहुजी !
मस्त धइपिं थथे हे खः । जिं वयात सःता ब्वःबियाबिइ ।'
निम्ह बौ-काय् छैय् लिहां वल ।



'स्व बाबु, जिगु खँ बांलाक्क न्यँ !' बौम्हेसिनं थः
काय्यात धाल, 'छं नं वयात भक्कुमार दाया वा । याकःचा वना
दा, मेपिं पासापिं ज्वना वनेदइमखु । थुलि याना वलधाःसा छ
जिमि काय् जुल, नत्र ... । ध्वाथुल ला ?'
काय्म्ह नमवाः । वरु उघ्रिमय् पिहांवन ।



पलख लिपा -
अन पौडेल बाज्या थः घाःपाः जूम्ह काय् नापं दंवल ।
'स्वइदिसँ, साहुजी, छि काय् नं थ्वयात दायेफक्व दाया
हल ।' बाज्या तंम्बया हाल ।
उघ्रिमय् साहुनं लिसः बिल 'तंचाया दिइमते, बाज्या !
छु याये ! मस्त धइपिं थथे हे खः । जिं वयात ब्वःबियाबिइ ।' ●



रासा

● चिबाखं

- दिलकुमारी डंगोल

ल्वापु

सबिनायात भाःतं प्यदं दुम्ह काय्यागु भाला क्वबिकावंगु नं निदं दयेधुंकल । काय्यात व्वनाकुथिं त्वःताः व ज्याकुथिइ वनी । सरोज नं व हे ज्याकुथिइ ।

सरोजया तिरिं नं खुदं दुम्ह काय् त्वःताः मेथाय् पय् नं वंम्ह जुयाच्वन ।

छगू हे ज्याकुथि ज्या याइपिं जूगुलिं निम्हेसिया नं खं ल्हायेगु स्वापू जूगु जुल । स्याक्क ब्याक्क हे स्वापू दु । थये जूगुलिं यःत्यःया स्वां ब्याक्के हे धुंकल । यःत्यःया खं निम्हेसिया इहिपा यायेगु क्वःछित । निम्ह जक सुतुक्क द्यःथाय् वनाः सरोजया ल्हातं सिंच्व तय्का सबिना सरोजया तिरिमय्जु जुयाः छेंय् दुहां वन । सरोजया सहमति हे काय्यात नं व हे छेंय् यंकल । सरोजं नं थः हे काय् थें नालाकाल ।

इहिपाया दच्छिया दुने हे म्हाय् नं सबिना व सरोजया तिपूया जिन्दगी बल । स्वम्ह मचा जुयाः परिवारय् पलाः गुलिं सबिना व सरोज लयल्यताल । लय्ताइगु स्वाभाविक हे खत ।

छुं ई लिपा स्वम्हं मचातय् दथुइ म्हितुम्हितुं मचातय् ल्वापु जुल । मचातय्गु ल्वापुं मांबौया नं ल्वापु जुल ।

‘छं काय् नं व म्हाय्यात दाल ।’

सबिनां सरोजयात तं पिकया धाल, ‘यक्व न्हयं छुकातःगुलिं मात्ते जुल । दूकूसां खिचाखि त्वपुइ थें त्वपुयाच्वन । छयनय् न्हुइकातल । वयात जि छुं धाये ज्यूगु मखु । आः खन मखुला ?’ म्हाय्यात कयपुयाः घाः क्यनाः धाल ।

सरोजं नं नये थें दाये थें याना सबिनाया न्हयःने वया ततःसलं ल्हाः म्हुँछिनां धाल, ‘छं काय् नं न्हापां मदाःगु सा व म्हाय्यात दाइ ला ? छं नं छं काय्यात बांलाक स्यनाति । कजे याना ति । खुब ययेक माया क्यनां पुलपुले यानातःगु का ।’



दिलकुमारी डंगोल

धाधां सरोजं थः काय्यागु लप्पा ज्वनाः छें दुने यंकल । सबिना नं थःम्ह काय् ल्हाः ज्वनाः छेंय् दुने यंकल ।

निम्हेसिया यःम्ह म्हाय् धाःसा दाःगु सह यानाः मख्वसें त्वाल्ल जुयाः स्वया जक च्वन ।

●

सच्छि वंगु नोट

तःभुखाय् ब्वयाः चिलिबाःगु छें, तू नकाः तालतुल याना च्वने जिल । च्वंने न्ह्यः सुचुपिचु यायेगु तातुना क्वथाय् चीकेचाय्के यानाच्वना ।

बँ पुये सिधल ।

धू मुंका च्वँच्वं सच्छि वंगु नोट छकू तुक्रुक कुतुंवल, फोहर ज्वीधुंकल तर चलय् जूनि ।

थ्व वहे नोट खः, जिमि बानं उबले चुरट न्यानाहिँ धकाः जितः ब्यूगु । जिं नोट कयाः बायात धया, 'हस बा । जिं चुरट छपु नं च्याकाः हये । साप हे तलतल जुल ।'

बायात छु जुल थें मस्यू - वय्कः खल । अले जितः स्वयाः धयादिल, 'छं अथे धायेमते पुता । बरु चुरट हे न्यायेम्वाल । जिं नं थनिं निसें चुरट त्वने मखुत । बरु थ्व नोट अन विहारय् भन्तेयात दान बियाथकि ।'

'हस् बा' धया नोटयात ग्वाखनय् तया । उबले हे तसकं भुखाय् ब्वल । उबले ला बा नं, जि नं बचय् जुल । तर स्वदँति लिपा नुगःल्वचं कया बा मन्त ।

सुचुपिचु यायेगु ज्या सिधय्का व हे नोट ज्वना विहारय् वना । बाया नामं व नोट भन्तेयात दान बिया ।

मुसुमुसु न्हिला 'साधु साधु साधु' धयादीगु न्ह्यलय् ला ज्वलय् ला धायेमफुत ।



लक्ष्मीचन्द्र बज्राचार्य



सरी अनुराधा

‘अफिसं वया ला ? का छ छाय् लिबात धका: बिचा: यानाच्चना का ?’ अनुराधा क्वथाय् दुहाँ वँव भा:तम्हं धयादिल ।

‘अँ थौ अफिसया हे ज्या सिमधयेकुसें मजिल । फुक्क टिमं याना नं न्हय्ता: ई जुल । हथा हथासं लिबाइ ला धका: स्कूटरं वयां नं छघौ जुल । अले गुबाय्ति थ्यंक: भाया ले ?’ अनुराधां लिस: बिल नापं न्ह्यस: नं तल ।

‘व ला जि इलय् हे वया । अले छ गबाय्ति वइ गुबले ज्वरय् याइ, नये धका: जकं पियाच्चनागु । च्या तकं मत्वना नि ।’ भा:तम्हेसिगु लाचार प्रतिक्रिया वल ।

अनुराधा त्यानुका, नयेमास्ते वयेका, हथाय् चायाव:गु । न्ह्याबलेनं नं अफिसया सिधय्का हथासं हथासं छैय् इलय् थ्यंका ज्वरय् याना, थलबल सिला नकाच्चंगु हे ख: । थौं लिबा:गुलिं भा:तम्हेसिनं ज्वरय् यानातइ धयागु आश नं या:गु ख: । इलय् छैय् वया नं ज्वरय् यायेत अनुराधायात हे पियाच्चंगु खँ न्यना थुपाले दुखित जुल । अले तं पिकया धा हे धाल, ‘श्रीमान्जु ! छु भा:त धाइम्ह नयेत जक, कला: धाइम्ह भा:तया सेवा यायेत जक ख:ला ? जि नं ज्यां लिहाँ वयाम्ह ख:नि, जिगु प्रयोग ज्वरय् यायेत, थलबल सिलेत, व भा:तया यौन सन्तुष्टीया लागी जक ख: ? छु जि थ्व छैया दास (च्य:) ला ? थ्व छैय् जिं आश यायेगु छुं मदु ? छिं नसा ज्वरय् या:गु जूसा छु छिगु पुरुषत्वय् छुं जुइ ला ? दुख सुख इने मज्यगु ख: ला ?’

थुलि धया त्वाँय् त्वाय् खल ।

भा:तम्हेसिनं बिचा: यात । ख:नि । मिसातय्गु दुगं जिम्मेवारीया बारे थम्हं गुबलेनं बिचा: मयाना । माग नं मया: । भा:तम्हेसिनं अनुराधायात ह्यय्का धाल, ‘सरी अनुराधा !’



स्नेह साय्मि

सलामी

मोहनी बलकिं वया साब लिमला: । व न्हापांनिसें
मोहनीया फुलपाटींनिसें धौ थाय्थासय् बिइ यंकुयंकुं लिमला: ।
थथे मोहनी वयेवं धौ जक कोसेली बिइ यंका: व अफिसया
हाकिम पदय् थ्यन । अथेसां वं धौ बिइ यंकाच्वंगु हे दु । छिं
मनय् खँ ल्हाकि, 'आ: सुयात बिइ यंकीगु जुइ धौ ! काय् म्थ्याय्
सकसितं जागीर नका: थासय् थ्यनेधुंकल ! धौ ला माकुक् थम्हं
सकाय् नयेमा: ।' खला वं धौ मेमेबले नं नके यंकु थाय्थासय्
तर मोहनीबले धा:सा मोहनी ज:छि हे धौ यंकुयंकुं लिमला: ।
न्हापा व बाइकय् चवनावनीगु, आ: कारय् चवनावनीगु ।



सौरभ शाक्य

नवमी खुन्हु जि मोटर मदया: रत्नपार्कय् वाताहां
चवनाचवनावले जिगु न्ह्य:ने वयागु कार ध्याक्क दिका: लुखा
चाय्का, 'छँय् वनेगु ख:ला ख्वपय् ?'

'जिं ख: मोटर मदया ... ।' जि दुहाँवना ।

कार न्ह्यात । जिगु मिखा लिक्सं च्वंगु छग: धौइ
जुत ।' धौ बिइ यंकेमानी ला ?'

'अँ ... बैकया सिनियर एकाउण्टेन सपरिवार बैकक
चाह्यूवंगु जुयाचवन थें फोन मयासें वना ! बरू छंत य:सा छंत
हे का ! जिगु पाखे सलामी ताय्की छं, गन लित यंकाचवनेगु थ्व
धौ ! आ: तक थथे गुबसं लित मयंकानि !'

जि मनं मनं लय्ताल अथे नं धया, 'म्थ्याय्पित बिइ
यंकूसां ज्यून ! जि हे उलि लय्ता:सा फ्वकताय् लाना, मेपिं
लय्मताइ ला ! थ्व हे लय्ताया हुनिं व थन थ्यन । धन्य धौ !



● चिबाखं

- राज सायूमि

सिरपा:

प्यला बित । सफू नं सिधल । पिथनेगु गथे याना ?
ध्यबा तयाबिइ धा:पिं नं मखना । थ:के नं यक्व ध्यबा दुगु मखु ।
दु, मदु याना: ध्यबा मुने । मचा बुया: प्वंगु मिसाया प्वा: थें थ:गु
म्हिचा प्वन । सफू पिदन ।

पिदंगु सफू ज्वना: उखें थुखें वने । न्हूदँ कुन्हु सुथ
न्हापां येंया वसन्तपुली दंवने । नेवा:त ग्वा:ग्वा: खने । 'भाषा
म्वा:सा जाति म्वाइ' या नारा नं न्यने । सफू छगू न्याना: काइ
ला थेंया आशा याये । आशां छाइ । सितिकं ब्यूसा 'सुभाय्'
धका: काइ । मखुसा तिल्वय् दुम्ह ल्वगि खं थें तापानाबिइ ।
सफू थ:के हे ल्यनी । सफू स्वथना तयेगु खँ नं मजुल । गन्य
मान्यपिंत द्य: भाग थें लुमंका इने । सफू फुइ ।

श्यामदासं च्वसा दिकल । थम्हं च्वयागु ब्वना: स्वल ।
हाकनं तनायन, 'सफू पिदन । लिच्च: न्यने आय्बुइ तर प्रतिक्रिया
शून्य । न्याना: मस्वल, म्वा:ल धाये । हनाबना तया बियापिनि
पाखें जक लिच्च: न्यनेदुसां मगा: मचा: खनीगु जुइ । अहँ
समालोचकतय् ल्हा: मन्त्या: । म्हुतु मसं ।'

ह्यामि जुया: हे न्यने, 'सफू ब्वनादीधुंगु ख:ला थें ?'

'ब्वने हे मलानाच्चन । अथवा बच्छि थ्यन ।' थुज्व:गु
रेडिमेड लिस: वइ । रचना बांला: बांमला: सिइमखु । भिंकेथाय्
खनी मखु । थ्व हे इलय् शताब्दी पुरुषया राग ताये दयावइ,
'सफू च्वयेगु जक मखु । अनुवाद नं यायेमाल । नेवा: साहित्य
त:मि । नोवेल पुरस्कारय् मिखा तयेमाल । तर मिखा कंकीपिनि
हे न्ह्य: व: थन । स्तर सिइकेगु गथे याना ?'

'थौं छु विषयस न्ह्यपु नाय्काच्चना च्वमि भाजुं ।'
नसा ज्वनाव:म्ह राधाया सिइकेगु मन जुल । श्यामदासं भ्वँतय्
वाकात:गु आख:ग्व: फुकं राधाया मिखां मुनाकाल । अर्थ थुल ।
ध्याचू नके थें वया म्हुतुसि बाल, 'सफू ला पिथना हे दिल ।



राज सायूमि

सिख: छपु, टप छज्व: ल्यंदनि ।
प्रतिक्रियाया नितिं धका: सिरपा:
छगू नं तयादिसं रे । स:बस:
लिच्च: लाबलां हे मुनी जुइ ।'

राधां सिइकं धा:गु ख:ला
वा मसिइकं कंगु ख:, श्यामदासं
मसिल । तर राधाया बागलय्
न्या:गु खँ वयात ताल्च्यां कयेकू
थें यल । सिरपा: दुसा च्वसा
न्ह्याके न्ह्या:पिनि ल्या: नं
ग्वाल्लल्ल हे दने दयावल ।

●

हर हर महाद्यः वा वये द्यः !

त्वाःया फल्वा । सिन्हाज्या त्ययावल । सर्गतय् सुपाँय्या
किचः तक मदु । अन फल्वाय् निगू मनूया किचः दु । छगू तुइ
नःगु किचः व मेगु हाकु नःगु किचः । तुइ नःगु किचलं आक्सय्
मिखा क्वल । ‘ओहो सिनाज्या त्ययावलं नं आक्सय् सुपाँय्या
किचः मखु । गुबले वा वइगु जुइ ?’

हाकु नःगु किचलं धाल, ‘वा वःसां छु मवःसां छु ? बुँ
छकूचा दुगु मखयेधुंकल ।’

तुइनःगु किचलं प्वाक्क धाल, ‘बुँ दःपिं दिन । मदुपिनि
मंत का ।’

हाकु नःगु किचलं लिसा कयाः धाल, ‘जितः ला वा
मवःसा मपाः । आः ब्वा, बाज्यापिसं याना वयाच्चंगु सिन्हाज्याया
परम्परा न्हंके मजिल । उकिं तलय् कःसिइ न्या तयाहइगु तुयुगु
थल न्यानाहयागु दु । थुगुसि उकिइ हे पुवाचा पियेगु क्वःछिना
का ।’

वयागु खँ न्यनाः तुइ नःगु किचलं वाकु छिना मिखा
ज्वय्पियाः धाल, ‘बुँ फुक्कं मियाः छ साहु जूम्ह जुल काय् । छं
निगू लखं म्यूगु बुँ आः आना नीन्यागू लख तःवल काय् ।’

‘नीन्यागू लख ला छु करोड तःवःसां मतवल मदु ।’

तुइ नःगु किचलं वा छकः वयेमाः धकाः, ‘हर हर महाद्यः
वा वये द्यः’ धकाः हालाः व नापं बायाः थःगु छैय् स्वयावन ।

फल्वाय् हाकु नःगु किचः याकःचा जुल । तुइ नःगु
किचःया लिपांगु खं वयागु नुगलय् ततःसलं धिमे थानाहल ।
ततःसलं भुछ्याये थानाहल । वया न्हाय्पिपिलि भिरिकुति जुइक
गुना वनेत्यन । वं न्हाय्पंवाः निपा ल्हातं तित । मिखा तिसित ।
अथे नं वयागु मिखां निफुति ख्ववि नुगःया ख्वःसः जुयाः
तिकि नन ।



बिमल ताम्राकार

हयूम्याय्न क्वाइन

थःत छुं भचा ध्यबा माःगुलिं ATM या मेशिन दुथाय् वना ध्यबा लिकायेत स्वया । ATM मेशिनं Withdraw invalid छुं लिकायेत स्वःगु ध्यबा ब्यालेन्सय् खनेमदु धकाः नोटिस खने दयाच्चन । जिं हाकनं कुतः याना । लिपा नं व हे नोटिस खनेदत ।

जि इतःमितः कन । छु जूगु थ्व ? गथे जूगु थ्व ?

लिक्कसं च्वंगु काउण्टरय् वना धया । 'स्वयादिसँ ले छुं भचा ध्यबा लिकायेत स्वयागु पिने च्वंगु ATM मेशिनय् विथड्र यायेत स्वयागु, तर ब्यालेन्स मदु धकाः नोटिस क्यनाच्चन । छु जूगु खः छकः स्वयादिसँ ले ।'

जिगु न्ह्यःने च्वंम्ह कर्मचारीं जिगु ATM कार्ड कयाः थःगु न्ह्यःने च्वंगु किबोर्डय् पतिंचा ब्वाकल, प्याखं ल्हुइकल जिगु ATM य् च्वंगु नम्बर स्वस्वं ।

मोनिटरय् स्वस्वं जिगु ख्वाः पुलुक्क स्वया धाल, 'ब्यालेन्स मदु धयागु मखुला ? ब्यालेन्स ला द हे दुनि । का स्वयादिसँ सा' धाधां मोनिटर जिपाखे स्वकल ।

जिगु मिखा मोनिटरय् थाकुरा जुयाच्चन । जिं डिपोजिट यानातयागु क्वाइन छुं नं मदु । अजू चाः । जिं डिपोजिट याना मतयागु धलः खनाच्चन -

अहम्या क्वाइन पुँजी थुलि त्यं दु

हिंसाया क्वाइन पुँजी थुलि त्यं दु

अराजकताया क्वाइन पुँजी थुलि त्यं दु

भ्रष्टाचारया क्वाइन पुँजी थुलि त्यं दु

विभेदया क्वाइन पुँजी थुलि त्यं दु

मोनिटरय् खनेदुगु थ्व धलखय् खनेदुगु क्वाइत पुँजी जिगु मखु । न त जिं डिपोजिट यानातयागु पुँजी हे खः थ्व ।



बद्री वेदना

थजाःगु पुँजी जिगु खाताय् गथे जुयाः लानाच्चंगु जि अजूचायाः न्यना । जिं ला हयूम्याय्न क्वाइन जक डिपोजिट यानातयागु खः ।

जिगु ख्वाः पुलुक्क स्वयाः धाल, 'छिं डिपोजिट यानातयागु रसिद दु ला थें ?'

जिं जिगु वालेतं लिक्काः क्यनाः डिपोजिट यानातयागु रसिद ।

मतिना माया स्नेहया क्वाइन पुँजी थुलि थुलि दु

आदर सद्भावया क्वाइन पुँजी थुलि थुलि दु
सुख व लसताया क्वाइन पुँजी थुलि थुलि दु
विकास व भरोसाया पुँजी थुलि थुलि दु

व कर्मचारीं हाकनं छकः जिगु एटीएम
कार्ड स्वस्वं किबोर्डय् नम्बर तिल । मोनिटरय्
स्वस्वं धाल, 'अय् ... थ्व ला म्हिगः हे एक्सचेञ्ज
यानातःगु खनेदु ।'

'एक्सचेञ्ज ?' अजूचासे जिं धया । 'युजर
नेम व पासवर्ड जिके - जिं सुयातं बियागु मदु
गथे जूगु थ्व ?'

'थजाःगु ज्या हाय्करतय्सं यात जुइ
... थजाःपिं ह्याकरत यक्व खने दयाच्चंगु दु ।'

'अय्सा छु जिं डिपोजित यानातयागु

ह्यूम्याय्न् क्वाइन आः जित दइ मखुत ला ?'

स्टाफं जिगु ख्वाः पुलुक्क स्वया धाल,
'छानबीन यायेधुंकाः जक धायेफइ ।' थुलि धया
स्टाफ मेगु ज्याय् तक्यन । जिगु पलाः काउण्टरया
पिनेपाखे स्वयाः न्ह्याःवन । तर न्ह्यसः जिगु
न्ह्यपुइ चाःहिलाचन ।

आः जिं सुयागु नुगःयात विश्वास याना
जिगु अनेक ह्यूम्याय्न् क्वाइन पुँजी डिपोजित
यायेगु ?

आः जि गजाःगु मनयात भरोसा याना
जिन्दगीया ह्यूम्याय्न् क्वाइन डिपोजित यायेगु ।

थजाःगु न्ह्यसः तिंतिंन्हुया जिगु न्ह्यःने
दंवयाचन । ●

● भाय्हिला-चिबाखं

- डम्बर रसिक भारती

अभिनय

'सर, दिसँ थन !'


विनय थःगु सिटं दने थें याना धाइ । दने तकं मछिंगु व
गाडी । थः सरयात थाय् त्वःता बिइत्यंगु खनाः विनयया
क्वमिलुपहयात जःखःयापितं तसकं बांलाः ताय्कल ।

'फेतु, बाबु फेतु ! जि दं हे दनेनि । उलि ताहाकः वनेमाःगु
नं ला मखुनि ।' सरं धयादिल ।

'दिसँ सर, दिसँ !' दने थें याना विनयं हाकनं लिसा कयाः
धाल ।

'गन सह जुइ ले मेपितं सिट बिया । जि नं ला गन मेपितं
सिट त्वःता बिइफु धकाः ! छं नं मेपितं सिट त्वःता बिइम्वाः
विनय' सरं ताहाकः न्ववानादिल ।

'सखे सरपिसं मस्यंक सय्कागु थ्व हे खः - जि नं सिट
त्वःतेगु हे मन गन दु धकाः, थज्याःगु अभिनय अथे अथें सइगु
जुयाचन अले माःगु नं जुयाचन सर ।' थथे बिचाः याना विनय
गजक्क चनाचन । ●



आजको कथा

आजका लघुकथा पौ ७५
भाय्ह्यूम्ह - बिमल ताम्राकार

ह्वःताः

वयेत्यंगु निर्वाचनय् पार्टीइ टिकट कायेगु इच्छा याःपिं
आपाः दसेलि 'खःम्ह ज्यूम्ह उम्मेदवार ल्ययेगु' विषयय् पार्टीया
मुँज्याय् मुनेत सःतल ।

मुँज्याय्, मुनावःपिं फुक्क दुजःपिसं विषयवस्तुइ थःथःगु
बिचाः प्वंकेत ई बिल ।

'देय् दुने ल्याय्म्हतय्गु ई जूगुलिं आःयागु निर्वाचन
ल्याय्म्हतय् न्हापांगु ह्वःताः बीमाः ।' छम्ह दुजलं धाल ।

'खः ... खः ... ! वय्कःयागु धापू जितः नं यल, देय्
ल्याय्म्हतय्गु ब्वहलय् वःगु दु । भीगु पार्टी पंक्ति नं ल्याय्म्हतय्गु
हे अप्वः दु । उकिं जिं वय्कःयागु धापूयात समर्थन याये ।' मेम्ह
दुजलं खँ तन ।

'ह्वःताः बीगु ला बी ! युवा पंक्ति दुने नं भी मिसा
दुजःपिं दी । हाकनं संवैधानिक प्रावधान कथं मिसातय्गु थाय्
सुनिश्चित याना मिसातय् न्हापांगु ह्वःताः बीमाः ।' छम्ह
मिसा नेतृ थःगु धापू न्ह्यथन ।

ह्व हे कथं आदिवासी/जनजाति, मदेशी, दलित,
पीछडा ... वर्गयात समानुपातिक रूपं ह्वःताः चूलाकाबीमाःगु
धापू वयेधुंकाः मुँज्याया क्वःछिनाय् - उम्मेदवार ल्ययेगु कमिटि
दय्का यायेगु 'उम्मेदवार छनौट आचार संहिता' छ्यलेगु
क्वःजित । गुकिया न्हापांगु ल्याः -

'निर्वाचनय् प्रत्याशी जुइम्ह दुजः पार्टीइ मू वंगु योगदान
दुम्ह ... , जेलनेल नःम्ह ... वनेधुंकूगु निर्वाचनया अनुभव दुपिं
मध्येय् ल्यये फइगु ... !




काशीराम विरस

श्याम आशाया 'लालटिन' जलय् चिबाखं

आख्यान साहित्यया छगू विधा चिबाखं खः । बाखं साहित्यय् न्हाबाखंयात अंग्रेजीइ Short Story व खस नेपालीइ लघुकथा धायेगु याः । चिबाखंया संरचना व स्वरूप Short Story व लघुकथा खँग्वः निगुलिं चिबाखंया परिभाषा दुने मलाः । चिबाखंयात अंग्रेजीं Mini Story, micro story, flash story वा shortest story कथं कायेगु यानाच्चंगु दु । थुकिं चिबाखंया वाह्य संरचनायात बःबियाः अतिकं चिहाःगु बाखंयात हे चिबाखंकथं कायेफु । अथे धकाः बाखंया कुचा हे चिबाखं मखु, चिबाखं अपूर्णगु बाखं नं मखु । दक्व गुणं पूर्वगु, बिस्कं मौलिकता व विशेषतां जाःगु बाखं हे चिबाखं खः, गुकियात खस नेपाली भाषय् 'लघुत्तम कथा' धायेगु याः । काव्यय् प्यभ्वःया मुक्तक कविताया थें आख्यानय् नं चिबाखंया अज्याःगु हे थाय् व अस्तित्व दु । छगू निगू वाक्यं निसें पीगू न्यय्गू वाक्यं चिबाखंया संरचना जुइफुगु धारणा दु । चिबाखंया थीथी धारणा मध्येय् Richard Hoggart या छगू मिनेटं ब्वने क्वचाइगु बाखं हे चिबाखं धाःगु दकले पाय्छिगु धापूकथं कायेफु । शैलिगत रूपं चिबाखं प्रतिकात्मक, आलंकारिकया नापं सुत्रात्मक व व्यङ्गात्मक जुइ । थौंकन्हय् चिबाखंयात थपुकेत गोष्ठी व चर्चा जुयाच्चंगु नालेबहःगु बांलाःगु पलाः खः ।

नेपालभाषाय् ने.सं. १०७३ दैय् पिदंगु 'मूस्वां' चिबाखं मुना सफुतिं निसें मौलिक चिबाखं प्रारम्भ जुइ । नेपालभाषा ख्यलय् थौं स्वयाः ४१ दै न्ह्यवं निसें संलग्न जुयाः साहित्यिक पौ 'न्हूजः', 'किकिंपा', 'तिबः' सम्पादन याना पिलुयाच्चंम्ह श्याम आशा स्थापित चिबाखंमि खः । वय्कःया दकले न्हापां 'बुद्ध बुगु थासय्' कविता ने.सं. १०९९ दैय् 'भी' लय्पतिइ



पूर्ण ताम्रकार

पिदंगु खः । वय्कःया न्हापांगु कविता पिदनाः निदँ लिपा हे 'ल्ट्वंगु ल्हाः (ने.सं. ११०१६) चिबाखं मुना पिदन । थुकि २८६या लिपा 'पंजलं दुने पंजलं पिने' (ने.सं. ११२९६) पिदन । वयां भिदँ लिपा श्याम आशाजुया 'बाःवःगु ख्वबि' व 'पिज्वये मफुगु सः' (ने.सं. ११३९६) चिबाखं मुना पिदन । चिबाखं रचनाय् श्याम आशाजुया च्वसा ज्वः धयागुया दसि थ्व खः ।

थौ वय्कःया 'लालटिन' (ने.सं. ११४०६) चिबाखं मुना पिदंगु दु । व मुनाय् ने.सं. ११३९ दँय् रचित १९पु बाखं दुगु कथं व 'ल्ट्वंगु ल्हा' चिबाखं मुना लिसाकथं पिदंगुलि श्याम आशा लोकं त्वाःम्ह चिबाखमि खः धयागु खँ उलाब्यू ।

'लालटिन'य् चिबाखं च्वमि श्याम आशां 'जिगु थःगु खँय् थ्व लालटिनं ब्यूगु जलं ख्युं तंकेत भचा सां ग्वहालि याःजुइ' धकाः च्वयादीगु दु । थुकिं थौं हिउपाः जुल धाःसां हिलासुया जः मत्वःगुलिं स्वःस्वःथाय् तक्क अन्धकार जुयाच्चंथाय् जः खंकेगु धयागु खः । खः नं थौं स्वःस्वःथाय् तक्कं थीथी कथंया विकृति, विसंगति व विसंगतिं जनता अतिकं उत्पीडित जुयाच्चंगु दु । थ्व हे विषयवस्तुइ 'लालटिन'या चिबाखं केन्द्रित जुयाच्चंगु खंकेफइ ।

'लालटिन' दुने बुद्ध जयन्ति खुन्हु बाहां स्याना भ्वय् नःपिंत ध्याचू नकातःगु बाखं 'भव्य भपियादिसँ' खः थें चाकडी मयाःगुलिं बेरोजगार जूगुया बाखं 'न्हूम्ह जि.एम.' खः । 'पत्रकारिता' सरकारया विरोध यानाः पिदनाच्चंगु पत्रिकाया सम्पादकयात स्वंगू पुस्ता गाक्क प्वाः जायेक ब्यूगु; मजदूर दिवसय् उद्यमीतय्गु ख्वाः यचु, नुगः वँचुगु; 'बेक्व मिखाय्' बुज्यामितय् जूयाच्चंगु अन्याः, अत्याः व पुनर्वास कम्पनीया हाकिमया भ्रष्टाचार; बुराबुरीतय्सं हनाच्चंगु यथार्थता 'बिइत्यंगु निभाः'; प्वाः द्यांलाकाः साहित्य

ब्वमलनीगुया बाखं 'पित्याःम्ह बाखं' खः । थथे हे श्याम आशाजुं 'द्यःया प्रसाद'य् नेतात भाषण बिइत निपूर्णपिं; 'बाखं नं काःम्ह जि'इ सी नं मफु, म्वाये नं मफुपिं अल्याख पीडित दुगु; 'तंगु सर्गत'य् भिंगु आज्जु ज्वनाः परदेश वीपिं बाकसय् कुंकाः वयाच्चंगु डायस्पोरिक जीवनया चित्रण; ख्युंथाय् मेपिनिगु नसात्वंसा व सामान थुथु यानाच्चपिनिगु अन्त यायेत जः त्वलेत लालटिनया संरक्षण यायेमाःगु खँ ध्वाथुइकाच्चनी । थ्व विषयवस्तुं सामाजिक, राजनैतिक विकृति व विसंगतिया चित्रण याना 'लालटिन' दुनेया चिबाखं समसामयिक यानाब्यूगु दु ।

'लालटिन'या चिबाखनय् संक्षिप्तता, सूक्ष्मात्कता, कौतुहलता व व्यंग्यात्मक खंकेफइ । थ्व चिबाखंया संरचनायात गुण वा तत्व कथं कायेगु याः । 'लालटिन'या चिबाखं नं छुं छगू राजनैतिक आस्था वा सिद्धान्तयात कय्च्यानाच्चंगु खनेमदु । अथेसां देय् दुनेया भ्रष्टाचार, थीकेगु बजाः भाः, हिउपाः, सुकुम्वासी, कर, द्यःया प्रसाद, टिपेक्स, लालटिन चिबाखं नं राजनैतिक विसंगति व विकृतियात छयाताहां उलाः ब्यूगु दु । थुकथं चिबाखमि श्याम आशा राजनैतिक सचेतना दुम्ह चिबाखमि धयागु खँ उलाब्यू ।

चिबाखनय् कथावस्तुयात थें अभिव्य-ज्जनावद्ध, शैलिगत कलायात नं उलि हे महत्व बियाच्चंगु दु । शैलिगत कथं प्रतिकात्मकता व विम्बात्मक, व उपमायात चिबाखंया आलंकारिक तिसा जक मखुसे आत्मा थें तायेकाच्चंगु दु । चिबाखं गुलि अप्वः विम्बात्मक, प्रतिकात्मक व उपमेय जुइ, उलि हे चिबाखं बल्लाइ, अज्याःगु बाखं हे अप्वः सशक्त व प्रभावकारी जुयाः संप्रेषणयुक्त जुइ । थ्व कथं 'लालटिन', 'टिपेक्स', 'सिनाच्चना' न्ह्यथनेबहःगु चिबाखं धायेमाः । 'लालटिन'या चिबाखनय् बिइत्यंगु निभाः थें,

चिकंफुगु पाल्वा थें क्वाःजः बिइम्ह सुर्चःयात,
सुर्चः लुकुंविइ थें च्वनावल, रंगया हिलाः छुं
जुइथें मतायेधुन, म्वाना नं सिनाच्चना जि, बाः
वःगु ख्ववि बागमतिया किनाराय् तुं गनाः वनाच्चन
थज्याःगु उपमा, प्रतीक व विम्बया दुसुनां
चिबाखनय् नस्वाः त्वयेका ब्यूगु दु । थुकियात
अभ् अण्वः विराट व विशालताय् हिलाबीगु कुतः
च्वमिपाखें जुइमाः ।

‘लालटिन’या चिबानय् पात्रया चरित्र
चित्रण, घटनाया यक्व प्रसंग व व्याख्या, विश्लेषणय्

ततःमक्यं । चिबाखंया अन्त नं अप्रत्याशित व
आकस्मिक कथं जुयाच्चंगु दु, गुगु चिबाखंया
स्वरूपकथं कायेगु याः । समग्रय् संरचनागत व
शैलिगतकथं नं ‘लालटिन’ चिबाखंया छगू
न्त्यथनेबहःगु दसु जूगु दु, छगू बौद्धिकता जाःगु
चिबाखं मुना जूगु दु । चिबाखंमि श्याम आशाजुं
च्वःसा मदिक्क न्त्याकाः चिबाखं साहित्य क्यबय्
अभ् नस्वाःगु बांवांलाःगु स्वां त्वयेकाः चिबाखंया
थपुइ छगू विस्कं योगदान बियाच्चनी धकाः आशा
याये । ●

ने.सं. ११४० सिल्लाथ्व पुन्ही/१

● भाय्हिला-चिबाखं

- कृष्ण बजगाई

स्पेयर पार्ट्स

चीमिपिनिगु लजगाः बन्द अर्थात् नेपाः बन्द न्हिन्हि
खानाः नयेमाःपिं दुवातय् छगू कुंचाय् मुनाच्चन । हंचा बहनि
छु नयेगु ? मचातय् छु धया थुइका बिइगु ? धयागु चिन्तां
ग्यानाच्चन । अनिश्चित कालिन नेपाः बन्दया बुखं भं चिन्तित
जुयाच्चन इपिं ।


‘बंगु लाय् जक जिं निकः हि मिया’ रिक्सा चले याइम्ह
रामचां धाल ।

‘थगुने ला खः जिं छगः जँलास्यें मियागु’ ठेला चले
याइम्ह हखबहादुरं न्यंकल ।

‘छुं ला न्त्यः ला जिं नं छपाः मिखा मिया नि’ कु
कुबिइम्ह धनबहादुरं न्वात ।

‘जिं नकतिनि मचाछें मिया’ सिं मिइम्ह मनमायां
धाल ।

‘क्वह्यंगु जिन्दगी ! नखःचखः वयेत्यन । मचात त्वचं
म्हासुसे च्वं । सर्वय्या नामय् छगू ज्यान ल्यंदनि । आः ग्व छु
मिइगु ? भी चीमिपिं तःमिपिनिगु ‘स्पेयर पार्ट्स’ थें जुयाः
बुयागु जुयाच्चन खनि ।’ हखबहादुरं खाइक्क खँ ल्त्वत । ●



आजको कथा

आजका लघुकथा पौ ४०
भाय्ह्यूम्ह - बिमल ताम्राकार

‘सः व खः’या बाखं दुने ...

न्त्यखं

‘सः व खः’ चिबाखं सफूया च्वमि धुव मधिकर्मीयात स्कूलया इलनिसें म्हस्यू थें च्वं । जि ब्वनागु स्कूलय् वय्कः जि स्वयाः नं निगू स्वंगू तगिं च्वय् थें खः ला मखु ला भतिभति लुमं । ईया हिलावंगु फसं छगू इलय् वय्कः पत्रकारिताया भवलय् थः धौख्यलय् ज्या यानाच्चनागु इलय् साक्षात्कार जूगु खः । लिपा सिइदत कि वय्कः छम्ह नांदम्ह बाखंमि गुम्हसिया च्वसा नेपालभाषा नापनापं खस नेपाली नं उतिकं हे न्ह्याः धकाः । वय्कःया च्वसु ‘मधुपर्क’, ‘थाय्भु’ अले मेमेगु यक्व पत्रपत्रिकाय् नं पिदं ।

वंगु छुं वाः न्ह्यः स्वक्वःगु नेपालभाषा साहित्य नखतय् ब्वति कया । निन्हु तक जूगु उगु साहित्य नखतय् लिपांगु निह अन प्यंगू दशक स्वयाः न्ह्यःया चिबाखंमि भाजु धुव मधिकर्मीया ‘सः व खः’ सफू न्याना । थनथाय् छगू अजुचायापूगु छु जुल धाःसा ‘सः व खः’ न्यानाः प्रज्ञा प्रतिष्ठानया पुस्तक प्रदर्शनी वनाः ‘थाय्भु’ दँपौ न्यानाः हानं छकः नेपालभाषा साहित्य नखः चाःहिला । सफू मियाच्चम्ह साहुनीनं ‘सः व खः’या हापं मब्युनी धाल । जि वाताहां जुल । ध्यवा म्हिचा पिकयाः उकिइ दुगु दां ल्याखाना । जिके लुमं कि उखुन्हु द्वाःछि वंगु छकू दुगु अले जिं छु गुलि खर्च यानागु दु फुकं लुमंका । अथेनं व साहुनीनं अथे धाःगुलिं दां निना । सच्छि दां मगाः । व साहुनीयात थम्हं व सफूया हापं बिइ धुनागु दसु बिया लिहां वया । लँय् ववं मति तया वया हानं अन छकः दुस्व मवंगु जूसा व साहुनीं वयाके कयागु सफूया ध्यवा मब्युसें वन धकाः मतिइ वनाच्चनीगु जुइ । थ्व छगू मति मदुगु चूलावःगु जुल । धन्य छु धाये । गथे गथे जुइ यः । छु छु न्यने मालेयः ।

चिबाखंच्वमि भाजु धुव मधिकर्मीया ‘सः व खः’ कौलाथ्व



दीपक राज 'ख्वप'

एकादशी १९४० दँय् सिर्जना अभियानपाखें पिदंगु सफू जुल । थुकि मुक्कं ३२ पु चिबाखं दु, अले पौल्याः ८०गूया चिधंगु सफू जुल । अथे ला वय्कःया बाखं सफूयात ने.सं. १९०९ दँया श्रेष्ठ सिरपालं छाप्पूगु ३१ दँ ल्यू वय्कःया थ्व बाखं सफू पिदंगु जुल । आः वय्कःया ‘सः व खः’या छुं खं । न्हापांगु बाखं याकः नेताय् छम्ह नेतां थः न्ह्यःनेया मनूया तुति सालाः क्वदय्का लं

पनाविया सुयातं न्त्यःने मछ्वसें थः याकः नेता
जुइगु बाखं दु ।

अथेहे खँ जक बाखनय् खँ छता ज्या
मेता धयागु चरितार्थ जू । खँ ला खःनि ल्हाल्हां
गन थ्यनी गन । लखं दुःख जूपिं मनूतय् दुरं
म्बःल्हुइगु म्हगस खनी । खँ ल्हाल्हां त्वनेगु लःया
समस्यां भय्ब्यूपिं गथे गन तुंगाः म्हुइ धाधां वा
वयेवं वाति फयेत तुंया खँ त्वःता फुककं वनी ।
च्वमिं थन मनूतय्के लिग्यां मदुगु न्त्यःने जक
मिखा दुगु कुलादीगु दु ।

भीगु समाजय् तपा ख्वालं पुयाः मेपिंत
गथे अन्याः याइगु थ्व ला धया च्वने हे माःगु
मखु । थथे हे ध्रुव मधिकर्मिया गनीम्ह बाखं नं थथे
हे वय्कलं गथे छम्ह धुं छम्ह छम्ह स्यानाः नं थःत
धर्मात्मा ताय्की । थुकिं समाजय् च्वनाच्चपिं तपा
ख्वाःयापिं मनूतय्कत यांकयाः ल्वाप्पा नकूगु दु ।

मेगु बाखनय् छम्ह बौ थः सन्तानयात
इमिगु तुति थनेत थुलित दुःख सिइकि वं छँ
बःहः तयाः थःगु कर्तव्य पूर्वकी तर थौया इलय्
ब्वनां जक नं मगाः छुं लजगाः चूलाकेत उलि हे
कतःया चाकडी यायेमाः । उखेथुखे न्त्याथे याःसां
छुं मजिया विदेशया ज्याय् डिभि लाना बौयात
त्वःता वनाविइ । थौकन्हेया फय् हे थज्वःगु छु
यायेगु ? मस्तय्कत मांबौपिसं इलय् हे वाःमचाःसा
व हे खँ जुइनि । चा धयागु नाइबलय् न्त्यायेमाः
छाये धुंकाः चा गन न्त्यायेफइ । थ्व धापू भीगु
जीवनय् तसकं महत्वं जाः । अथेहे च्वमिया मेगु
बाखं मस्तय्कत मचाः धाःगु बाखनय् अस्यःपिं
मस्तय्कत छु यायेमज्यू व हे याइ धयागु क्यनातःगु
दु । बाखं कथं छम्ह धुं गामय् दुःख बियाः फुकं
जानाः व धुंयात कुनाः तालं ग्वयाविइ । पंजलय्
च्वम्ह धुंयात लैय् जुइपिं मस्तय्कत हिस्याइ ।
अज्वःम्ह छम्ह अस्यःम्ह मचां ताः छ्यानाविइ ।
अले इमिसं व हे ताः लिक्काः थ्वाना म्हिती ।

उखे धुं पंजलं पिहांवःगु इमि वाःचाइमखु ।

च्वमिया थ्व बाखनय् छम्ह द्यःया गुलि
कतकं जक द्यः माने याकाच्चनेगु थःथम्ह हे द्यः
जुइदुसा धयाः थःगु थासं उखेथुखे स्वःवनी ।
छथाय् म्हमस्यूपिं मनूत छथ्वः थःगु किपाय् पुज्याना
च्वनिगु खनि । इमिगु ल्हातय् तुपः, भाला, कथि
ज्वनाच्चंगु खनि । थःत पुज्यानाच्चंगु हुनिं द्यः
लय्ताया छँय् हइ । द्यःया लुमनि कि छम्ह ब्यारां
महाद्यःया सेवा चच्छिं जाग्राम च्वना धर्म याःगुलिं
महाद्यः लय्ताया वयात बांलाःगु वरदान बिइ ।
थ्व खनाः स्वर्गं स्वां वा गाय्की । थःत नं अथे हे
यायेत उजं जुइ । तर व द्यः छँय्या जःलाखःला-
तय्सं अःखः गन गनयापिं मनूत ज्वनावल धया
भनू तंचाइ । द्यःयात ब्वः बिइ । अथे खना थः
अन च्वने मछुया द्यःछँ पिहांवइ ।

चिबाखंमि भाजुया मेगु बाखं बय्बय्
जुयाः छम्ह मनूयात न्हिने हे शोषक, सुराकी
धया वयागु छँनं पिने हयाः दायाः स्यानाविइ ।
अज्वःगु क्रान्तिकारी ज्याया पर्चा ह्वला ध्यवा नं
लुटे याना यंकी । पत्रपत्रिकां व ज्या क्रान्तिकारी
धया बुखं पिदनी । अज्वःगु हे ज्या छथ्वः मनूतय्सं
बहनी याइ इमिगु ज्यायात आतंककारी डकैत
धाइ ।

ग्वंजया मिखाय् खुसि सिथय् म्हिताच्चपिं
मस्तय् जुइ । उकिइ मध्ये छम्ह हारांम्ह मचां
सकसितं ख्याना थः नायः जुयाच्वनी । आः अन
म्हितीगु जक मखु, ल्वाइगु जुयावइ । खुसि सिथय्
ग्वंज दु धया लँजुवाःतय्सं मस्तय्कत उखे मवनेत
धाइ । अस्यःम्ह व मचां ग्वंजयात मिखाय् लाक्क
अःपां कय्की । ग्वंजं छुं लिच्वः बिइमखु खालि
मिखा पुलुपुलु कना मौका पियाच्वनी ।

भीगु समाजय् ब्याप्त न्हूगु बाय् बासिगु
धापूयात चिबाखंमि भाजु ध्रुव मधिकर्मिया बाखनं
ध्वाथुइका ब्यूगु दु कि छगू हे थासं वःगु लः न्हूगु,

बासी गथे जुइ धया । बाखं कथं च्वमि भाजुं लः
 त्वनेत्यंबलय् मामं व लः बासी मेगु लः त्वं धया
 उजं जुइ । थुकथं च्वमिं समाजय् जानाच्वंगु
 पुलांगु बिचाःयात उलादीगु दु । अथे हे छगू
 पुलांगु नांचा चले याना थःगु प्वाः थनेमाःगु
 माभीया कथावस्तु अले गणतन्त्रात्मक देय्या
 तःध्रिपिं व्यक्तित्वया म्हसीका बफरा माभीं छुं
 मस्यूगु बाखं खः म्हस्यूला । नेतां जनता म्हमस्यूगु
 व जनतां नेता म्हमस्यूगु थ्व बाखंया प्रस्तुति
 ब्याकं पाय्छि जुइक बाखंमि भाजुं न्त्यब्वयादीगु
 दु । न्हियान्हिथं थःगु ल्हाः तुति चुलाः नयेमाःगु
 चिमिम्ह मनूया यथार्थ बाखं च्वमिं न्हाय्कं क्यने
 थें क्यनादीगु दु । बाखं कथं छम्ह नेता नांचाय्
 च्वनाः खुसि छिनाः छथाय् न्वचु ब्यूवनेमाःगु
 जुइ । छम्ह म्हमफूम्ह माभीया पुलांगु नांचा व
 थःगु विवशता देय्या थीथी नेतात लिसें प्रधानमंत्री
 तक म्हमसिइगु बाखं जनताया यथार्थ लिसें
 यक्व सती । उकिया अःखः व माभीं नेतायात
 छिं जितः म्हस्यूला ले धया न्त्यसः छुइगु देय्या
 नेतायात न्यतालय् च्याराक मिंक नकूगु च्वमिया
 ज्वः मदुगु दसु खः ।

छम्ह मचायात थीथी मनूतय्सं थीथी
 वस्तु बियाः थःत मन दुकथं ल्हुइकीगु बाखं जुल
 प्याखं । मचायात वं याःगु व ल्हूगु प्याखंयात
 च्वछाय्का वयात अज प्याखं ल्हुइकी । व मचां
 थः मांबौयाके थम्हं ल्हुयागु प्याखं बांलाः ला
 बांमलाः ला न्यने तक ई मदइगु च्वमिया बाखं ।

ल्वाभः ज्वनाः ख्याये ला न्त्याम्हेसिनं
 फइ अथें ख्याये फुसा खः धाःगु च्वसाया बाखं
 खः खतं । थ्व बाखनय् ल्वाभलय् मखु मनूया
 दिमागय् खतं नःगु क्यनातःगु दु । ल्वाभः ज्वनाः
 सकसितं ख्यानाच्वंम्ह छम्ह मनूयात मेम्हसिनं
 ल्वाभः लाकाकया घ्वाना छ्वइ । उकिं ल्यू थःके
 वः मदुगु वाःचाय्कीगु बाखं खः खतं । धाइगु दु

नि छुं भति तःसः याना हालकिं छु जात्रा याना
 च्वनागु धया । बाखंमि भाजुया बाखनय् छगू
 न्हूगु वस्तु क्यनाः बजारय् न्त्यब्वइगु गुगु खना
 मुक्कं मनूत अजू चाचां उकिया ल्यू ल्यू जुइगु हे
 जात्राया सार । च्वमिया मेगु बाखनय् तातुना
 मदुगु आज्जु मालेत थःगु जीवनया स्वीदं फुका
 ब्वां जुइम्ह मनूया बाखं जुल आज्जु । धात्थें हे
 थ्व बाखनय् ब्वमिपिनि मनय् तिक मिंकेत तसकं
 ताःला च्वमि । जीवनया स्वंगू दशक ल्यू प्यदुका
 लँय् गुखे वने जुइगु धयागु छगू असफल जीवनया
 बाखं ।

च्वमिया मेगु बाखं बुद्ध गनं मदु कथं
 छम्ह ब्यारां गुँइ छम्ह पंछियात गोलीं कय्का व
 पंछि थःगु हिलं म्हछिं बुतुबुला च्वंथाय् वया मेपिं
 पासपिसं भुनाच्वनी । बाँय् छतपत जुयाच्वंम्ह व
 भंगःयात मेपिसं धयाच्वनी छ सिइ न धया । व
 भंगलं उखेथुखे स्वयाच्वंगु खनाः छम्ह भंगलं
 न्यनी छु मालाच्वना धया । लिसलय् वं मफु
 मफु धाइ छम्ह बुद्धयात । अथे धाधां वया म्ह
 छखे ग्वारातुइ । थथे हालाच्वं च्वं हे व ब्यारा छुं
 मामां अन थ्यंकः वइ । चाकःछिं वयात भुनाच्वपिं
 भंगःत भुरुर ब्वयावनी ।

कारवाही बाखनय् नाकाबन्दी जुयाः फुक्कं
 अभाव जुइ मचिकं, डिजेल, पेट्रोल । थथे जुयाः
 हाकु बजा याइपिं अप्वः जुइ । मनूतय् चिकंया
 लाइनय् च्वनेत निघौ, स्वघौ च्वनेमाली । अले
 इमिसं छु याइ अथे ताःई पियाच्वनेगु स्वयाः
 भतिचा ध्यवा अप्वः पुलाः न्यायेगु याइ । थथे
 सिया सरकारं भन कडा यानाबिइ । जनताया
 मनय् याउँसे च्वनी । इमि ख्वालय् आनन्दया
 स्वां त्वइ । हाकुबजाः बन्द जुइ । तर जुयाबिइ
 उकिया अःखः । लाइनय् मच्वंसं न्याइपिनि उकिया
 दां भन अप्वः पुलेमाली । छाय् थथे धकाः
 मनूतय्सं न्त्यसः तल किं मस्यू ला सरकारं

गपाय्च्वंक कडा याःगु । अज्वःगु इलय् थिके
याना कायेमाः । उकिं थिके जुइगु ला स्वाभाविक
हे नि धया लिसः बिइ । जनता विवश । असहाय ।

अथेहे च्वमिया क्वँय् मदुगु मे बाखनय्
जातभात व उकिया भेदभादया खँ दुथ्याः । च्वमिया
कथं साहित्य सम्मेलनय् सुद्धा थज्वःगु सःतःजुइमह
मनू ताःन्वया छम्ह नैचां मियातःगु तुसि न्याइ ।
व तुसि नैचां चि तयाः बिइत्यनी । जातपात
अले भेदभादया सः थ्वय्का जुइमह व मनुखं चि
तयेमते, जितः चि मयः धया क्यनीगु बाखं साप
हे बांलाः । क्वँय् मदुगु मे ला खःनि न्ह्याथें
पुइकुसां ज्यूगु छगू च्वमिया यथार्थ ।

भाजु ध्रुव मधिकर्मीया लँपंख्याः व याकः
नेताया बाखंचु छगू हे धाःसां मपाः । निगुलिं
बाखनय् थः स्वयाः ब्वाँय् वनीम्हेसिया तुति सालाः
थः न्हाप लाइगु अले ल्युने वइपित लँ पनीगु
बाखं खः । छगुलिं लँय् दनाः लँ पना बिइबलय्
मेपिं न्ह्यःने मवइ उसानिसें व इमि याकः नेता
जुइगु । मेगुलि अथे लँ पना लँपंख्याः जुइगु ।
अले मनूत ब्वाँय् वनेत दिइगु बाखं जुल । थथे
स्वयेबलय् बाखंया छयं जक पाःगु खनेदु ।

छम्ह मेय्या आत्मविनोदया बाखं खः
च्वमि भाजुया बाखं स्वय्का । मनुखं न्ह्याथें
याःसां याकाच्चना आः स्वय्का छु याइ धयागु
आत्मलोचनाया बाखं खः थ्व । नाय्चां मेय्यात
वाउंगु घाँय् छम्हू बियाः न्ह्यःने च्वंगु तुति चिइ ।
अथेयाःसां आः छु याइ स्वय्का धयागु मनं तुनी,
मेसं । मनमनं जिगु थपाय्धंगु पहाड थजाःगु म्हं
थ्व मनूयात सन्यापति चिं थें पतिचिंका बिइ ।
लिपा व नाय्चां प्यपां तुति चियाः खिपः साली ।
मेसं जिगु थ्व न्वकुलिं भ्वरी पिहां वयेक च्वया
मब्यूसा धया हानं बिचाः याइ, मेसं । थुबले व
नाय्चं चुपि ज्वय्की । मेसं न्हासं फ्वाँय्फ्वाँय्
दीर्घ सासः ल्हाइ । विवश व नाय्या न्ह्यःने चुपि

ज्वय्काच्चंगु स्वयाच्चनी । उकिं ला धयागु जुइ
नाय्या न्ह्यःने मे ख्वां छु याये धयागु धापू ।

कालया न्ह्यःने सुयां छुं लगे जुइमखु
धयागु बाखं जुल महिता । छम्हेसित इमिसं
त्याप्प ज्वनी । थःगु लँय् यंके त्यनी । व विवश
मनू जि वयेमखु छिमिसं धाःथाय् धया लिसः
बिइ । इमिसं जवर्जस्त याइ । इमिगु न्ह्यःने
वया छुं लगे जुइमखु । थ्व जिमिगु थाय् थन
दाजुकिजा दु जि मस्त दु स्वः इपिं ल्वानाहल जिं
वनेमाल धाइ ।

इमिसं जिमित छु मतलब छुकिया च्यूताः
धया तुति नापं स्वताक्क ज्वनी । अथे नं व
हाली । जिमि कलाः पियाच्चंगु दु धाइ जि वयेमखु ।
इमिसं धाइ वये हे माः धया भुन स्वताक्क
ज्वनी । आः वयाके उकिया प्रतिकार यायेगु बः
फुनावनी । इमिसं वयात लुया यंकी । अन्तय् वं
थःत सीगु खनि । थथे जन्म जुयाः सीमाःगु थ्व
चोलाय् मांबौ, दाजुकिजा, कलाः, काय् म्थ्याय्
धया गन च्वनेदइ । कालं नु धालकिं न्ह्यामहं वने
हे माः । चाहे जुजु जुइमा बाय् लोकजन । च्वमिया
बाखंया सार थ्व हे ।

छम्ह पार्टीया कार्यकर्ता थःगु पार्टीया
लागिं दुखं सुखं ज्या याना जुइ । वया पार्टी
सरकारय् वयेवं व मनू मन्त्री जुइ । मन्त्री जूगु
सिइवं जःलाखःलात, थःथितित, सतिगु नाता
तापाःगु नाता, भोटरत वं वयात वं वयात ज्वं थें
फुक्कं मन्त्री थाय् । गुम्हं ख्येय् सगं ज्वनावःपिं
गुम्हं भिंतुना ब्यूवःपिं, गुम्हं छु याःवःपिं । मन्त्री
महोदय थः हे अजूचाः । म्हिगः तक थःथिति
हातानाता सुं मदुमह वया आः म्वःम्वः मनू ।
अज्वःमह मन्त्री लिपा नापलाःसां मखंछु यानाहइ,
ताःसां मताःपह यानाहइ । मनूतय खँ जुइ ।
मन्त्री ला कां जुल, ख्वाँय् जुल । धया । तर व हे
मन्त्री छम्ह साहूनापं करोडौं ध्यबा घुस नःगु खँ

बुखँय् पिदनेवं मनूत अजू चाइ । मिखां मखंम्ह व मन्त्रीं ध्यवा गथे कलेकले खन धया ।

च्वमिया छगू बाखनय् वर्तमानया छपा क्पिपा दु । मिखा दया नं मिखां मखंगु व्यथा दु । कां जुयाः मखनीगु मनूया कोलाहल नं मताःगु न्त्याथाय् स्वःसां भिभांमिजां दंगु मसां खंकूगु दु । अथेहे लुइकेमानीगु दसि बाखनय् छम्ह न्यायाधिशया मेच हे संकेफूगु बाखं न्त्यव्वयातःगु दु । मनू खया नं वया उजंकथं ज्याकथं मजुया वया अन्यायं छम्हसित स्याइ । अदालतय् वयात न्यायाधिशं सजाय बिइ । व मनुखं न्यायाधिशत सजाय व्यूगु बदला थम्हं नं सजाय फयेमा धाइ ।

वय्कःया ल्वय् बाखं नेतातय्त ध्याचू नकातःगु छगू बाखं जुल । नेताया प्वाः स्याःगु ल्वय् डाक्टरतय्सं लायेके मफयाः विदेश वनाः वासः याकावइ । प्वाः स्याःगु त्वह तयाः सरकार विरुद्ध आन्दोलन याना क्वथइ । न्हूगु सरकारय् व वइ । ल्वय्या त्वह तया विदेश वना खँ व्याका सःताः थःगु पक्षय् हइगु ल्वय् बाखं ।

च्वमिया धुकचुक बाखनय् नास्तिक व आस्तिकया बाखं दु । खय्त ला नास्तिक जुइ धयागु जिगु थःगु बिचाःकथं मनूया पूर्वाद्ध व उत्तराद्ध जीवनया इलं थः थम्हं हे पाः वनी ला धयागु बिचाः । छायाःसा जीवनया उत्तराद्ध इलय् मन निर्वाण आध्यात्मय् बिचालय् लाइ । च्वमिया थ्व बाखनय् नं अथे हे लु । ल्वहंया द्यः भागि मयाइम्ह मनू थःगु जागीर मिले जुयाः छयं जक क्वछुकीगु मखुसं भागि याना जुइगु थुकिया बाखंचु । हानं व हे मनू त्वनीबलय् धाःसा राक्षस जुइ द्यःयात हे न्ह्याः थ्वाना जुइगु धयागु मेगु लु ।

देय्या हिलावंगु राजनीति कथं गुगु इलय् आन्दोलनकारीया रूपय् जुयाच्चापिं नेतात सरकार

क्वदला न्हूगु सरकारय् थीथी थासय् वःगु स्वया च्वनागु जुल, खनाच्च्वनागु जुल । थथे हे विषयया ज्याभाला बाखनय् आन्दोलन यायेगु, लँ बन्द यायेगु, मोटर च्याकेगु अले अज्वःगु इलय् व्वाय् जुयाच्चंगु एम्बुलेन्स सुद्धा लित छवया बिइगु हे च्वमिया बाखं । नापं नकचरातय् हजार दाउ धया थें थः सत्ताय् वयेत न्त्यागु नं याइगु बाखं ।

प्वक्तां बाखनय् पौराणिक बाखं रामा-यणया राम सीताया सीताहरण थें हे बाखं न्त्यव्वयातःगु दु । रामया बानर सेनात गथे सुग्रीव, हनुमान, जाम्बुवान थजाःपिं सेनातय्सं गन यंकल जुइ धया मामां पक्वचा छँ, कंभाः, गुँइ स्वस्वं वँवं छथाय् समुद्रय् सिथय् थ्यनी । समुद्रया दथुइ इमिसं छगू टापू खंकी । सुग्रीवं सीता अन दइ ला धाइबलय् हनुमानं जिं छकः कुतः याये ला धाइ । थ्व खँ न्यनाः जाम्बुवान वयात व्वः बिइमाःगु ला व भीसं थन तक वया थःगु कर्तव्य पूर्वके हे धुन । छु भलसा इमिसं सीतायात अन हे तयातःगु जुइ धया । उकिं सुंक लिहां नु धया उजं बिइ । इपिं प्वक्तां लिहां वनी ।

थनथाय् जितः छु धायेमास्ति वलधाःसा रामायणया बाखंकथं च्वमि भाजु भतिचा फ्यासुगु तायेका । छायाःसा पुलांगु बाखं कथं छगू इलय् लक्ष्मण बेहोश जुयाः जडिबुटी वासः कायेके छवइबलय् हनुमानं मसिया पहाड हे ल्त्वना हइगु भीसं व्वनागु खः । अज्वःम्ह व्वयाः पहाड हे ल्हातय् तया हयेफूम्ह हनुमानयात च्वमिया बाखनय् निरिह कथं क्यनातःगु भतिचा मत्वल ला ?

नेपाःया न्त्यागु नं थासय् गन नेवाःत दु चाहे स्वनिगलय् बाय् स्वनिगलं पिने हे थः मजुइमा इमिसं थम्हं याना वयाच्चंगु कला, संस्कृति, रितिथिति याना वयाच्चंगु भीसं स्वयेदु, व्वनेदु अले न्यनेदु । थन चिबाखंमि भाजु धुव

मधिकर्मि 'सः व खः' बाखनय् खःजात्राया इलय् हःपाः बियाः माने याइगु जात्राया बाखं न्ह्यःव्वःगु दु । खःजात्रा न्ह्याइगु इलय् न्ह्याम्हेस्यां हःपाः बिइमदु बाय् मदयेमाःगु खः थ्व नापं स्वापू दुपिं थीथी मनूत, गुरुजुपिसं जक हःपाः बियाः खः साली । च्वमि भाजुया 'सः व खः' बाखं सफूया नामं अले व हे नांया बाखनय् हःपाः बिइम्हेसिनं हस्से धालकिं लुइपिसं हाँइसे धया खः साली । व हःपाः बिइम्हेसित छम्हसिनं छुं धाइ अले व म्हफहिइका हःपाः बिइ । थथे न्ह्यःने ल्यूने जवं खवं फहिहिं हःपाः बिइबलय् चाकःछिं हे हस्से हाँइसेया सलं लकस थ्वइ । थुकिया सलं खः हे खने मद्यावन धयागु धापू च्वमिया ।

मनूया जीवनय् थः म्वात्तले नयेमाःगु वस्तु जुल वा, जाकि, बजि आदि । थुकियात असारं वा पिना मंसीरं लया दच्छि तक माःगु अन्न खत । थ्व हे विषयवस्तुइ चिबाखंमि भाजुया हःपौ बाखं कथं असार फुइत्यना नं वा मवया लोकजनया वा पिइ मखना सर्गतय् थस्वया जुइ । सर्गतय् गनं सुपाँय् छकूचा हे मदइ । अले मनूतय्सं छः लय्ताय्केत दक्वं मुना छगू खुसि सिथय् वइ । इमिसं लिक्सं च्वंगु सिमा हलय् छम्हेसिनं म्हति नं सच्छि सच्छि हलय् वा वय्का ब्यु प्रभु धाधां व हः खुसि चुइकाछवइ । लिपा इपिं सर्गतय् थस्वया लय्तायाच्वनी वा वइगु आसं । थन च्वमिं समुद्र न्ह्यःने दु थः धाःसा प्याःचाः धयागु उक्ति ब्याः क्यंगु जुल । छायाःधाःसा खुसि मज्जां न्ह्यानाच्वंगु दु वा पिइपिं धाःसा सर्गतय् थस्वयाच्वंगु दु धया छगू कथं न्यंकूगु तसकं हे च्वछायेवह ।

खसु बाखनय् पुलिसत धयापिं फै थें खः धयागु क्यंगु दु । बाखं कथं छम्ह पुलिस च्वमिया न्ह्यःने स्वाँय्स्वाँय् याना ब्वाँय् वया नापं च्वंवइ । व पुलिसयाके लाकांया चबुगु पुतु, हिं प्याःगु

चकू मुजा छपा, कोट थथे हे थीथी ज्वलं दइ । वं च्वमियाके न्यनी थनं नकतिनि सुं बिस्युवंगु खना ला, ख्वालय् घाःखू दुम्ह वसतय् हिभ्याः किनाच्वंम्ह, लाकां छपाय् पुतु मदुम्ह धकाः न्ह्यसः तइ । च्वमिं उकिया लिसलय् नकतिनि ला मखं लच्छि बाछि न्ह्यः चाहि खं धया पुलांगु खं लुमंका छगू थाय् क्यनी । पुलिस च्वमिं क्यंगु लं पाखे मनूत चिइका बिस्युवंगु माःवनी । व इलय् लकस खसुं त्वपुइ धया बाखं जुल ।

थाःगाः मदुगु लँय् जुयाच्वंम्ह च्वमिया बाखनय् थम्हं छथाय् दुवातय् गामं वःपिं मनूत ध्वतुइ । गन वनेत्यना धाइ वय्कलं । लिसलय् खाडीइ ज्या याःवने त्यना धाइ मनूतय्सं । अनं भति लिपा छम्ह ल्याय्म्हयाके न्यनी । वयागु लिसः अमेरिका बाय् अष्ट्रेलिया धाइ । च्वमि वँव मूलँय् थ्यनी । अन छम्ह समानुपातिकया सांसद नापलाइ । च्वमिं ल्हाः ज्वजलपे याना गन भायेत्यना धाइ सा वं एसइइया जाँच ब्यु वनेत्यना धया लिसः बिइ । थथे यायां च्वमि लँय् याकःचा जुइ । थम्हं थः गन थ्यन धयागु वाःचाइ मखुगु बाखं खः थाःगाः मदुगु लु ।

च्वमिया दकले लिपांगु बाखं खः लुँया संसार । थ्व बाखनय् रामं लुँयाःम्ह चला खनाः व ल्यूल्यू वनी । कलियुगया रामसीता छेंय् बौनापं ल्वानाः कलाः ज्वनाः डेराय् च्वंवनी । थथे चलाया ल्यूल्यू वना घाँय् क्यनी । चला उखेथुखें बुरुक बुरुक ब्वाँय् जुइ । राम नं वया ल्यूने वनी । वँवं छगू गुँइ थ्यनी, राम । अन वं दक्वं सल, किसि, धुँ, ध्वं, च्वले फुक्कं फुक्कं लुँयापिं खंकी । अन ला राम थःगु न्ह्यःने छु जनावर दु वया ल्यूल्यू जुइ । वं थःत लुँया संसारय् तंकी ।



ने.सं. ११४० सिलाथ्व चतुर्दशी

लुँध्वाखा नेपालभाषाया बाखंया स्वलापौ जुया पिदनेत्यंगुलिं
मदिकक सुथां लाक्क पिथने फयेमा धका: भितुना ।



Shyam G. Kayastha

Managing Director

☎ : 9841271848
9808800008

PASA VETERINARY

Kwachhen, Bhaktapur-5

☎ : 6613322

A.B.S. Farmulation

Manufacture of Veterinary Medicine

Chundeви, Bhaktapur-1

☎ : 6612460, 6611591



पासा भेटेरिनरी क्लिनिक

साकवथा, ख्वप, ☎: ६६११०५६

E-mail: ramkayastha12@gmail.com



डा. राम गोपाल कायस्थ

(वि. भि. एम्सी. एण्ड ए. एच.)

वरिष्ठ पशु चिकित्सक

वे.प.चि.प.द.नं. १५७

मो. ९८४१२१८५३९

☎: ६६११२८० (घर)



डाक्टररी सेवा, पशु व बुँज्याया बासः, भ्याक्सिन, गोबर जाँच
दुध, प्राविधिक सेवा व छँबाय् सेवा ।

यासा सस्त्रानिनी क्लिनिक



डि. एन. टेलर्स
D.N. Tailors

ईलाछें, मिनिबस पार्क-१, ख्वप
याँगायल्या: ६६१३१६५ (पसा), ६६११८२२ (छें)

दिपानन्द बज्राचार्य
प्रोप्राईटर

मोबाईल :
९८५१०९८२३५



मौसमकथंया न्हगु बालाःगु डिजाइनया तनिगु सार्टिङ्ग
सुटिङ्ग टेलरिङ्गया नाप दक्क स्कूल व कलेजया ड्रेस कापः
व तयारी शुट दु ।

Shirting Suiting & Tailoring Centre

दिव्य रत्न शाक्य
९८४१७५३२५३

हर्ष रत्न शाक्य
९८४१२२७८७



दिज्ञान शाक्य
९८४३५१८४५८

दिपेस शाक्य
९८६०६७८०३२

हर्ष ज्वेलर्स इन्टरनेशनल प्रा. लि.

सूर्यविनायक, गःपलि, ख्वप, याँगायल्या: ६६१६३५६
Email: harshajewels@gmail.com



थन अईर कथं लै, वतया ज्वलं दयेकेगुया नाप राशी
कथंया पञ्च धातुया अंगू न दयेका ।

चाँगुनारायण नगरपालिका

खरिपाटी, भक्तपुर



चाँगुनारायण नगरपालिकाद्वारा नगरबासीहरूमा आह्वान :

- १) आफ्नो घर, आँगन, वातावरण सफा र स्वच्छ राखौं ।
- २) घटना घटेको ३५ दिन भित्रै सम्बन्धित वडा कार्यालयमा गई घटना दर्ता गरौं ।
- ३) समाजमा भातृत्व र आपसी समझदारी कायम राखौं ।
- ४) कुनै पनि भौतिक निर्माणको कार्य गर्दा सम्बन्धित वडा कार्यालयमा सम्पर्क गरी प्रक्रिया र मापदण्डको विषयमा जानकारी राखौं ।
- ५) विकास निर्माणको काममा सहयोग गरौं ।
- ६) घर निर्माण गर्दा नगरपालिकाले तोकेको मापदण्ड र प्रक्रिया भित्र रही निर्माण कार्य गरौं ।